

金石古文





編主五雲王

編初成集書叢

文古石金

中華民國二十五年十二月初版

輯者 楊 慎

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

金石古文叙

西蜀揚子專精載籍窮索崑
輿所著凡鉛餘錄古文韻語
韻林原訓及所選采樂府律
祖譜篇踵躋增華變辭加厲
間多肯賢所塗發茲哀集金

石古文九十四卷歐陽子讀
漢髡鬻頌醜斃關止潮澤旋
朝陽之平滲莫究麻旨楊子
類弘分鮮焯朕可諧豈非負
胥純賦漁用苦力春幾衛泉
孟學摹本塗善予茲巡行也

暇愛綴班畫謀諮漢中李守
重刑焉後餘皇猷其能釋禩
助崇明嘉靖三十三年仲冬
望日賜進士第率勅巡按陝
監察御史永嘉省菴孫昭書

金石古文卷一

成都 楊 慎 輯 綿州 李調元 校定

倉頡陽虛山丹甲青文石刻

上天垂命皇辟迭王

按河圖玉板云倉頡爲帝南巡登陽虛之山臨于元扈洛汭之水靈龜負書丹甲青文以授之文棍二十八字景刻于陽虛之石室李斯止識八字曰上天垂命皇辟迭王今已不可尋矣慎按爲帝南巡作一句爲音去聲言奉黃帝命而代之南巡也

衡山雲密峯神禹碑

承帝曰嗟翼輔佐卿水處

讀作洲渚

與登鳥獸之門參身

洪流而明發爾興久旅忘家宿岳麓庭智營形折心
罔不辰往求平定華岳泰衡宗疏事哀勞餘伸禋鬱
塞昏徙南瀆衍享衣制食備萬國其寧竄舞永奔

徐靈期衡山記云夏禹導水通瀆刻石書名山
之高酈道元水經注云禹治洪水血馬祭衡山
於是得金簡玉字之書按省玉字通水理也或
曰此卽金簡玉字之文云劉禹錫寄呂衡州化
光詩云傳聞祝融峯上有神禹銘古石琅玕姿

秘文龍虎形崔融云於鑠大禹顯允天德龍畫
傍分螺書匾刻韓退之詩岫嶠山尖神禹碑字
青石赤形模奇又云干搜萬索何處有森森綠
樹猿猱悲蓋亦求之而未得見也宋朱晦翁張
南軒同遊南嶽尋訪不獲其後晦翁著韓文考
異遂謂退之詩爲傳聞之誤蓋以耳目所限爲
斷也王象之輿地紀勝云禹碑在岫嶠峯又傳
在衡山縣雲密峯昔樵人曾一觀之自後無復
可尋宋嘉定中蜀士有好奇者不憚高峻始陟
其所乃濡紙脫其文七十二字刻于夔州觀後

亦磨滅近張季文僉憲在長沙得之云是宋嘉定中何致字子一者模刻于嶽麓書院斯文顯晦信有神物護持哉昔人好古如韓劉朱張求一見而不可得余流辟裔土乃獲坐玩之亦竒且幸矣遂拓刻之安寧州法華山之晚照峯仍建亭曰岫樓亭

廬山紫霄峯石穴中禹刻

鴻荒漾余乃櫛

地輿志江西廬山紫霄下有石室中有禹刻篆文有好事者繼而入摹之凡七十餘字止有鴻

荒漾余乃儻可辨餘不可識慎又觀水經注云
廬山之南有上霄石膏壁緬然與霄漢連接上
霄之南大禹刻石志其里數丈尺今猶得刻石
之號焉又云九江中孤石在落星石傍介立大
湖中周迴一里竦立百丈上生林木而飛禽不
集耆舊相傳昔禹治水至此刻石紀功又云會
稽覆釜山亦有堯碑禹篆十二字福建莆田縣
陳崑山有自然仙篆以紙摹之形類禹刻何翥
詩鳥書蟲文不可識如讀响嘍神禹碑禹之遺
跡靈秘如此號曰神禹抑有由矣

商鼎銘

嗛嗛之德不足就也不可以矜而祇取憂也嗛嗛之食不足狃也不能爲膏而祇離其咎也

比干墓銅盤銘

右林左泉後岡前道萬世之靈茲焉是寶

金石古文卷一

金石古文卷二

成都 楊慎 輯 綿州 李調元 校定

周宣王石鼓文

我車旣攻我車旣同我車旣好我馬旣駘君子云獵
云獵云遊麇鹿速速君子之求彎彎肉弓弓茲以時
我驅其時其來猥猥德德負卽御卽時麇鹿速速其
來大塗我驅其來犢犢射其豚屬

右甲鼓

汧繁泛泛丞彼潮淵鯉鯉處之君子漁之漫漫有鯨
其遊徹徹白魚鱗鱗其蒞底鮮黃白其鱗有鮒有白

其胡孔庶鬻之皃皃洋洋趨趨其魚惟何惟鱣惟鯉
何以橐之惟楊及柳

右乙鼓

田車孔安鑿勒駟駟六師旣簡左驂翻翻左驂驥驥
我以躋于原我戎止陸官車其寫秀弓時射麋豕孔
庶麇鹿雉兔其原有連其戎奔奔大車出洛亞獸白
澤我執而勿射多庶遶遶君子乃樂

右丙鼓

帥彼鑾車忽速填如秀弓孔碩彤矢笑笑四馬其寫
六轡沃若徒駢孔庶廓騎宣博酋車載道如徒如章

原隰陰陽赳赳六馬射之簇簇有驅如虎獸鹿如兕
怡爾多賢迪禽奉雉我兔允異

右丁鼓

我來自東霑雨奔流逆湧盈盈渫隰君子旣涉我馬
流汧汧絜洎淒丞士駕言西歸舫舟自廓徒駢連連
惟舟以道或陰或陽極深以戶出于水一方丞徒徨
止其奔我以阻其乃事

右戊鼓

宣猷作原作周導遄我辭攸除帥被阪田莽爲世里
希微穢乃罟漆栗柞械其拔櫓楮庸庸鳴條亞若其

華何爲所旂彘彘水盞導旨樹幽晤

右巳鼓

徒御嘽嘽然而師旅填然會同又繹以左戎障弓矢
孔庶洎洎是熾射夫寫矢具奪舉掌其徒肝來或羣
或友悉率左右燕樂天子來嗣王始振振復古我來
攸止

右庚鼓

彼走驕驕馬庶皙皙華華雉毳位多庶微我師氏憲
文武何其一之

右辛鼓

我水既淨我道既平我行既止嘉樹則里天子永寧
日惟丙申旭日杲果我其旁導乘馬既迎敵夏康康
駕彼四黃左駿騁騁右駿駉駉棨戟以奕汝不執德
旛翰黎黎旒旒施施公謂大來余及如茲邑曷不余
及

右壬鼓

吳人憐亟朝夕傲惕載西載北勿奄勿伐若而出奇
進獻用特歸格藝祖告于太祝櫛嘗受享致其方藝
寓逢中圃孔庶麇鹿原隰既坦疆理曠曠大田不蒐
君子何求有謀有始周爰止于是

右癸鼓

此文在太學潘迪有音訓凡四百九十四字于
得唐人拓本於李文正先生凡七百二字蓋全
文也嘗刻之木以傳矣然都元敬金薤篇劉梅
國廣文選所收仍是殘缺四百九十四字本蓋
亦未見此也

周齊侯鍾銘

惟王五月辰在戊寅師于淄陞公曰汝及余經乃先
祖余旣敷乃心汝小心畏忌汝不墜夙夜官執而政
事余命汝政于朕三軍肅成朕師旣之政德諫罰朕

庶民左右母諱及不敢弗敬戒虔卹乃死事穆和三
錫休命公曰及汝康能乃有爭率乃敵僚余用登純
厚乃命汝及母曰余小子汝敷余于艱阻虔卹不易
左右余一人余命汝城差正饗繼命於外內之事中
敷溫刑汝以敷戒公家應卹余于命刻伐履司敗乃
靈師保少臣惟輔咸有九處禹之都不顯穆公之孫
其配嚳公之妯而餒公之女雩生叔是侖于齊侯之
所是小心共齊靈乃考虎謹恪其政事有共于桓武
靈公之所桓武靈公錫乃吉金鐵鎬元鏐鏐鑪乃用
作鑄其寶鍾用享于其皇祖皇妣皇母皇考用祈眉

壽令命難老不顯皇祖其作福元孫其萬福純魯和
協而九事畏若鍾鼓外內斷辟都俞造而屏臬母或
承類

周齊侯罇鍾銘

惟正五月辰在戊寅師于淄陞公曰汝及余經乃先
祖余旣敷乃心汝小心畏忌汝不墜夙夜官執而政
事於宏厭乃心余命宏政于朕三軍成朕師旗之政
德諫罰朕庶民左右母諱及不敢弗敬戒虔此乃死
事穆和三軍徒衡雩乃行師慎中乃罰公曰及汝敬
共辭命汝應肅公家汝恐恪朕行師汝肇勲于戎攻

余錫汝釐都藩爵其祿三百余命汝佑辭釐造國徒
僕爲汝敵寮乃敢用拜手稽首弗較不對揚朕辟皇
君之錫休命公曰及汝康能乃有事率乃敵寮余用
登純厚乃命汝及母曰余季汝敷余于艱卹虔卹不
易左右余一人余命汝差饗爲大事繼命于外內之
事中敷溫刑汝以敷戒公家應卹余于溫卹汝以卹
朕壽命命難老不顯皇祖其作福元孫其萬福純魯
和協而九事俾若鍾鼓外內開辟造而屏臬母或承
類汝壽考萬年承保其身俾百斯男而執斯字盡義
政齊侯左右母央已至于葉曰武靈成子子孫孫永

保用享

姜鼎銘

惟王九月乙亥晉姜曰余惟嗣政先姑公晉邦余不
辱安寧經雍明德宣邴我猷用招君辭辟委揚乃先
烈虔不墜諸覃享以寵我萬民嘉清錫我虎賁千兩
勿廢文侯頽命俾貫通宏征鯨湯原取乃吉金用作
寶尊彝用康西夏妥懷遠廷君子晉姜用蘄綽緇眉
壽作敷爲亟萬年無疆用享用德峻保其子孫三壽
是利

毛伯敦銘

惟二年正月初吉王在周邵宮丁亥王格于宣榭毛
伯內門立中廷佑祝邠王呼內史冊命邠正曰邠昔
先王旣命汝作邑繼五邑祝今余惟曠商乃命錫汝
赤芾彤冕齊黃鑿旂用事邠拜稽首敢對揚天子休
命邠用作朕皇考龔伯尊敦邠其眉壽萬年無疆子
子孫孫永寶用享

韓城鼎銘

惟王九月乙亥晉姜曰余惟嗣朕先姑君晉邠余不
叟妄寧丕離明德宣邠我猷用函戾辟辟姬易久光
剿虔不墜諸覃享以舊我萬民嘉遣我錫胃責千兩

勿法文侯頽今俾貫通宏征繁湯員受久吉今用作
寶尊鼎用康西夏綏懷遠邦君子晉姜用祈綽縮眉
壽考缺爲極萬年無疆用享用德吮保孫子三壽是
利

周郊鼎銘

王命尸臣官此郇邑賜爾旂鸞黼黻琫戈尸臣拜手
稽首曰敢對敷天子丕顯休命

衛靈公沙邱石槨銘

不憑其子靈公奪而里

金石古文卷二

金石古文卷三

成都 楊慎 輯 綿州 李調元 校定

秦詛楚文

久湫 久讀作故

又通作秦嗣王敢用吉玉瑄璧使其宗祝郡馨布愍

告于不顯大沉久湫以底楚王熊相之多罪昔我先

君穆公及楚成王寔戮力同心兩邦若一絆以婚姻

衿以齊盟曰葉萬子孫母相爲不利親仰大成久湫

而質焉今楚王熊相康讀作庸回無道淫泆耽亂宣侈

競縱變渝盟刺內之刑則暴害不辜戮孕婦幽刺親

戚拘圉其叔父寘諸寘室櫬棺之中外之則冒改久

心不畏皇天上帝及大沈久湫之光烈威神而兼倍

十八世之詛盟率諸侯之兵以臨加我欲剗伐我社

稷伐滅我百姓求蔑法皇天上帝及大沉久湫之邨

祠圭玉犧牲逮取我邊城新郛

音皇

及郛

音於

長親我不

敢曰可今又悉興其衆張矜億怒飾甲底兵奮士盛

師以徧我邊境將欲復其賁

音兕

迹唯是秦邦之羸衆

敝賦鞫

讀作鞫

鞫

音俞

棧輿禮使介老將

去聲

之以自救也

亦應受皇天上帝及大沉久湫之幾靈德賜克劑楚

師且復畧我邊城敢數

上聲

楚王熊相之倍盟犯詛著

諸石章以盟大神之威神

巫咸

文與久湫同

亞馳

亞馳讀作呼施
文與巫咸同

右秦詛楚文凡三曰久湫曰巫咸曰亞馳其石皆出宋世說者謂初得巫咸文於鳳翔次得久湫文於渭又次得亞馳文於洛其詞則一惟告於神者隨號而異自石文之出黃魯直張芸叟皆有訓釋歐陽公董彥遠王順伯皆有論辨世必猶有存者偶米之見俟尋訪以校今音之異同又東坡鳳翔八觀詩嘗紀其事舊在府廡宣

和中歸御府云

登鄒嶧山刻石文

皇帝立國維初在昔嗣世稱王討伐亂逆威動四極
武義直方戎臣奉詔經世不久滅六暴強二十有六
年上薦高號孝道顯明既獻泰成乃降專惠親巡遠
方登于嶧山羣臣從者咸思攸長追念亂世分土建
邦以開爭理攻戰日作流血于野自秦古始世無萬
數也及五帝莫能禁止迺今皇帝一家天下兵不復
起災害除滅黔首康定利澤長久羣臣誦畧刻此樂
石以著經紀

登泰山刻石文

皇帝臨位作制明法臣下修飭二十有六年初并天下罔不賓服親巡遠方黎民登茲泰山周覽東極從臣思迹本原事業祇誦功德治道運行諸產得宜皆有法式大義休明垂于後世順承勿革皇帝躬聖既平天下不懈于治夙興夜寐建設長利專隆教誨訓經宣達遠近畢理咸承聖志貴賤分明男女禮順慎遵職事昭隔內外靡不清淨施于後嗣化及無窮遵奉遺詔永承重戒

登琅邪臺刻石文

維二十六年皇帝作始端平法度萬物之紀以明人
事合同父子聖智仁義顯白道理東撫東土以省卒
士事已大畢乃臨于海皇帝之功勤勞本事上農除
未黔首是富普天之下搏心揖志器械一量同書文
字日月所照舟輿所載皆終其命莫不得意應時動
事是維皇帝匡飭異俗陵水經地憂恤黔首朝夕不
懈除疑定法咸知所辟方伯分職諸治經易舉錯必
當莫不如畫皇帝之明臨察四方尊卑貴賤不踰次
行姦邪不容皆務貞良細大盡力莫敢怠荒遠邇辟
隱專務肅莊端直敦忠事業有常皇帝之德存定四

極誅亂除害興利致福節事以時諸產繁殖黔首安
寧不用兵革六親相保終始無寇賊驩欣奉教盡知
法式六合之內皇帝之土西涉流沙南盡比戶東有
東海北過大夏人迹所至無不臣者功蓋五帝澤及
牛馬莫不受德各安其宇維秦王兼有天下立名爲
皇帝乃撫東土至于琅邪列侯武城侯王離列侯通
武侯王賁倫侯建成侯趙亥倫侯昌武侯成倫侯武
信侯馮毋擇丞相隗林丞相王綰卿李斯卿王戊五
大夫趙嬰五大夫楊樛從與議于海上曰古之帝也
地不過千里諸侯各守其封域或朝或否相侵暴亂

殘伐不止猶刻石以自爲紀古之五帝三金王知教
不同法度不明假威鬼神以欺遠實不稱名故不長
久其身未歿諸侯陪叛法令不行今皇帝并一海內
以爲郡縣天下和平昭明宗廟體道行德尊號大成
羣臣相與誦皇帝功德刻于金石以爲表經

登之罘山刻石文

維二十九年時在中春陽和方起皇帝東游尋登之
罘臨照于海羣臣嘉觀原念休烈追誦本始大聖作
治建定法度顯著綱紀外教諸侯光施文惠明以義
理六國回辟貪戾無厭虐殺不已皇帝哀衆遂發討

師奮揚武德義誅信行威輝旁達莫不賓服烹滅強
暴振救黔首周定四極普施明法經緯天下永爲儀
則大國哉字縣之中承順聖意羣臣誦功請刻于石
垂于常式

刻碣石門文

遂興師旅誅戮無道爲逆滅息武殄暴逆文復無罪
庶心咸服惠論功勞賞及牛馬恩肥上域皇帝奮威
德并諸侯初一秦平墮壞城廓決通川防夷去險阻
地勢既定黎庶無繇天下咸撫男樂其疇女修其業
事各有序惠被諸產久竝來田莫不安所羣臣誦烈

請刻此石垂著儀矩

登會稽山刻石文

皇帝休烈平一字內德惠攸長一十有七年親巡天下周覽遠方遂登會稽宣省習俗黔首齋莊羣臣誦功本原事迹追道高明秦聖臨國始定刑名顯陳舊章初平法式審別職任以立恒常六王專倍貪戾傲猛率衆自疆暴虐恣行負力而驕數動甲兵陰通間使以事合從行爲辟方內飭詐謀外來侵邊遂起禍殃義威殊之殄熄暴悖亂賊滅亡聖德廣密六合之中被澤無疆皇帝并宇兼聽萬事遠近畢清運理羣

物考驗事實各載其名貴賤竝通善否陳前靡有隱
情飭省宣義有子而嫁倍死不貞防隔內外禁止淫
泆男女潔誠夫爲寄殺之無罪男秉義程妻爲逃
嫁子不得母咸化廉清大治濯俗天下承風蒙被休
經皆遵軌度和安敦勉莫不順令黔首修潔人樂同
則嘉保太平後敬奉法常治無極輿舟不傾從臣誦
烈刻此石光垂休銘

秦蜀守李冰誓江神碑

竭不至足盛不沒腰

秦蜀守李冰湔壩堰官碑

深淘渾淺包隄

渾古灘字隄卽堰也

冰在蜀治水澤利民功烈盛矣誓神而至今不敢違之教民而民至今不能違之其文又簡古如此真異人哉

金石古文卷三

金石古文卷四

成都 楊 慎 輯 綿州 李調元 校定

漢魯相置孔子廟卒史碑

司徒臣雄司空臣戒稽首言魯前相瑛書言詔書崇

聖道勉

闕

藝孔子作春秋制孝經

闕二

五經演易繫

辭經緯天地幽讚神明故特立廟褒成侯四時來祠
事已卽去廟有禮器無常人掌領請置百石卒史一
人典主守廟春秋饗禮財出王家錢給大酒直須報
謹問大常祠曹掾馮牟史郭元辭對故事辭雍禮未
行祠先聖師侍者孔子子孫太宰太祝令各一人皆

備爵太常承監祠河南尹給牛羊豕雞

闕二

各一大

司農給米祠臣愚以爲如瑛言孔子大聖則象乾坤

爲漢制作先世所尊祠用衆牲長吏備

闕二字

欲加寵

子孫敬恭明祀傳于罔極可許臣請魯相爲孔子廟

置百石卒史一人掌領禮器出王家錢給大酒直他

如故事臣雄臣戒愚慙誠惶誠恐頓首頓首死罪死

罪臣稽首以聞制曰可元嘉三年三月二十七日壬

寅奏洛陽宮

元嘉三年三月丙子朔廿七日壬寅司徒雄司空戒

下魯相承書從事下當用者選其年四十以上經通

一藝雜試通利能奉宏先聖之禮爲宗所歸者如詔
書書到言永興元年六月甲辰朔十八日辛酉魯相
平行長史事卞守長擅叩頭死罪敢言之司徒司空
府壬寅詔書爲孔子廟置百石卒史一人掌主禮器
選年四十以上經通一藝雜試能奉宏先聖之禮爲
宗所歸者平叩頭叩頭死罪死罪謹案文書守文學
掾魯孔和師孔憲戶曹史孔覽等雜試和修春秋嚴
氏經通高第事親至孝能奉先聖之禮爲宗所歸除
和補名狀如牒平惶恐叩頭死罪死罪上司空府
讚曰巍巍大聖赫赫彌章相乙瑛字少卿平原高唐

人令鮑疊字文公上黨屯留人政教稽古若重規

闕

乙君察舉守宅除吏孔子十九世孫麟廉請置百石卒史一人鮑君造作百石吏舍功垂無窮於是始

闕

右漢魯相置孔子廟卒史碑今在曲阜蓋魯相

乙瑛上書請置百石卒史一人典主守廟司徒

吳雄司空趙戒以聞制從之蓋在元嘉三年三

月後魯相平補以孔和上書於司空府則永興

元年六月也攷之范史桓帝紀元嘉惟有二年

碑云元嘉三年三月者蓋是年五月始改永興

至十月而雄戒亦罷免矣

此碑殘闕據宋洪丞相隸釋錄其全文蓋漢文高古難得將以供學士大夫之嗜好而不特此碑然也凡子之錄漢刻其殘闕者皆以洪本足之

漢魯相晨孔子廟碑

建寧二年三月癸卯朔七日巳酉魯相臣晨長史臣謙頓首死罪上尚書臣晨頓首頓首死罪死罪臣蒙厚恩受任符守得在奎婁周孔舊寓不能闡宏德政恢崇壹變夙夜憂怖累息屏營臣晨頓首頓首死罪死罪臣以建寧元年到官行秋饗飲酒泮宮畢復禮

孔子宅拜謁神坐仰瞻榱桷俯視凡筵靈所馮依肅肅猶存而無公出酒脯之祠臣卽自以奉錢修上案食醜具以敘小節不敢空謁臣伏念孔子乾坤所挺西狩獲麟爲漢制作故孝經援神契曰元邱制命帝卯行又尚書考靈耀曰邱生倉際觸期稽度爲赤制故作春秋以明文命綴紀撰書修定禮儀臣以爲素王稽古德亞皇代雖有褒成世享之封四時來祭畢卽歸國臣伏見臨壁雍曰祠孔子以太牢長史備爵所以尊先師重教化也夫封上爲社立稷而祀皆爲百姓興利除害以祈豐穰月令祀百辟卿士有益於

民矧乃孔子元德煥炳光于上下而本國舊居復禮之日闕而不祀誠朝廷聖恩所宜特加臣寢息耿耿情所思惟臣輒依社稷出王家穀春秋行禮以供禋祀餘闕賜先生執事臣晨頓首頓首死罪死罪臣盡力思惟庶政報稱爲效增異輒上臣晨誠惶誠恐頓首頓首死罪死罪上尚書時副言大傅大尉司徒司空大司農府治所部從事昔在仲尼汁光之精大帝所挺顏母毓靈承敝遭衰黑不代倉闕闕沛應聘歎鳳不臻自衛反魯養徒三千獲麟趣作端門見徵血書著紀黃玉韻應主爲漢制道審可行乃作春秋復演孝經刪定六藝象興天談

鈎河撻洛却揆未然巍巍蕩蕩與乾比崇

魯相晨孔廟後碑

相河南史君諱晨字伯時從越騎校尉拜建寧元年

四月十一日戊子到官乃以今日拜闕孔子望見闕

觀式路處蹠既至升堂屏氣拜手祇肅屑僂髣髴若

在依依舊宅神之所安春秋復禮稽度元靈而無公

出享獻之闕字欽因春饗道物嘉會述修壁雍社稷

品制卽上尚書參以符驗乃敢承祀餘胙賦賜刊石

勒銘并列本奏大漢延期彌歷億萬

時長史盧江舒李謙敬讓五官掾魯孔暢功曹史孔

淮戶曹掾薛東門榮史文陽馬琮守廟百石孔讚副
掾孔綱故尚書孔立元世河東大守孔彪元上處士
孔褒文禮皆會廟堂國縣員穴吏無大小空府竭寺
咸俾來觀并泮宮文學先生執事諸弟子合九百七
人雅歌吹笙考之六律八音克諧蕩邪反正奉爵稱
壽相樂終日於穆肅雍上下蒙福長享利貞與天無
極

史君饗後部史仇誦縣吏劉耽等補完里中道之周
左牆垣壤決作屋塗色修通大溝西流里外南注城
池恐縣吏斂民侵擾百姓自以城池稻濡麥給令還

所斂民錢并史君念孔瀆顏母并去市道遠百姓酤
買不能得香美酒肉於昌平亭下立會市因彼左右
咸所願樂

又勅瀆并復民飭治桐車馬於瀆上東行道表南北
各種一行梓

假大子家顏母并舍及魯公守家吏凡四人缺與佐
除

漢魯相造孔廟禮器碑

惟永壽二年青龍在涖歎霜月之靈皇極之日魯相
河南京韓君追惟太古華胥生皇雄顏闕育闕寶俱

制元道百王不改孔子近聖爲漢定道自天王以下
至于初學莫不馳思歎仰師鏡顏氏聖舅家居魯親
里并官聖妃在安樂里聖族之親禮所宜異復顏氏
并官氏邑中闕一字發以尊孔心念聖歷世禮樂陵遲
秦項作亂不尊圖書背道畔德離敗聖輿食糧亡于
沙邱君於是造立禮器樂之音符鍾磬瑟鼓雷洗觴
觚爵鹿俎桓邊枅禁壺修飾宅廟更作二與朝車威
熹宣杼元汗以注水流法舊不煩備而不奢上合紫
臺稽之中和下合聖制事得禮儀於是四方士仁聞
君風燿敬咏其德尊琦大人之意遑壘之思乃共立

表石紀傳億載其文曰

皇

闕一
字

統華胥承天畫卦顏育空桑孔制元孝俱祖

紫宮大一所授前門九頭以什言教後封百王獲麟
來吐制不空作承天之語乾元以來三九之載八皇
三代至孔乃備聖人不世期五百載三陽吐圖二陰
出識制作之義以俟知闕一
字於穆韓君獨見天意復

聖二族遠越絕思修造禮樂胡璉器用存古舊宇愍
勲宅廟朝車威熹出誠造闕漆不水解工不畢賈深

除元汗水通

闕

注禮器升堂大雨降澍百姓訴和舉

國蒙慶神靈祐誠竭敬之報天與厥福永享年壽上

極華紫旁伎皇代刊石表銘與乾運耀長期蕩蕩於
盛復授赫赫罔窮聲垂億載

韓明府名勅字叔節潁川長社王元君真二百河東
大陽西門儉元節二百故涿郡太守魯庶次公五十
故會稽太守魯傳世起千故樂安相魯庶季公千故
從事魯張嵩眇高五百相主簿魯薛陶元方三百相
史魯周乾伯德三百

韓勅碑陰

故涿郡太守魯庶次公五千故從事魯張嵩眇高五
百潁川長社王元真二百故會稽太守魯傳世

闕一
字一

千相主簿魯薛陶元方三百河東太陽西門儉元節

二百故樂安相魯庶季

闕一字

千

闕一字

相史魯周乾伯

德三百曲成侯王曷二百遼西陽樂張普仲堅二百

潁川長社王季孟三百故督卸魯趙輝彥臺二百河

南成臯蘇漢明二百其人處士汝南宋公國陳漢方

二百郎中魯充宙季將千河南雒陽种亮奉高五百

故山陽南平陽陳漢甫二百御史魯孔翊元世千故

兗州從事任城呂育季華三千任城番君舉二百太

尉掾魯孔凱仲第千故下邳令東平陸王裒文博千

任城王子松二百魯孔曜仲曜二百魯孔儀甫

闕一字

百故頰陽令文陽鮑宮元威千任城謝伯威二百處

士魯孔方廣率千河南雒陽李申伯百任城高伯世

二百魯孔巡伯陽二百文陽蔣元道二百趙國邯鄲

宋鎮元世二百相主簿薛曹闕一濟興三百魯孔憲

字闕一則闕文陽闕三文豫二百彭城廣闕一姜尋孔

長二百相中賊史薛紹興公二百尚書侍郎魯孔彪

元上三千平原樂陵朱恭敬公二百薛闕一高闕三

魯孔闕一漢光三百南陽宛張光仲孝二百平原隰

陰馬二元冀二百相史卞呂松遠百守廟百石魯孔

恢聖文千彭城龔治世平二百騶韋仲卿二百裒成

侯魯孔建壽千河南雒陽王故子慎二百泰山鮑丹
漢公二百處士魯劉靜子著千故從事魯孔樹君德
千京兆劉安初二百故薛令河內溫朱熊伯珍五百
故從事魯王陵少初二百魯孔朝升高二百魯石子
重二百下邳周宣光二百故豫州從事蕃加進子高
千故督郟魯开輝景高二百故平陵令魯庶侯元世
五百行義掾魯弓如叔都二百河間東州齊伯宣二
百魯曹性初孫二百魯劉仲臣二百北海劇袁隆展
世百陳國苦虞崇伯宗二百魯關一元達二百魯夏字
侯廬頭百魯周房伯臺百東海傳河東臨汾敬謙字

季松千 闕 尉 闕 五 安季興五百相守史諱在芳世祖

二百魯孔建壽二百時令漢中南鄭趙寡學子 闕 魯

曹壽文 闕 相 闕 六 賜公 闕 一 輝世平百故丞魏令河

南京丁璿叔舉五百河浦退師度 闕 澤賢 闕 二 魯傳

字 闕 一 子豫二百俟我交父治真百東郡武陽桓仲豫

二百左尉北海一趙福字仁直五百南陽平氏 闕 四

二百魯 闕 字 一 三百魯孔昭叔祖百元廬城子二百出

陽瑕邱九百元臺三百魯齊伯賢二百河東臨汾敬

字 闕 一 子直千泰山鎮平韋仲元二百 闕 二 狼子二百

國廣張達平二百其 闕 一 處士魯劉聖長二百河南

雒陽左叔虞二百泰山費淳于陵季遺二百上黨長

子楊萬子三百河南偃師骨闕一通國闕二東郡武

陽董氏 二百故闕二侯相彭城劉闕一伯存五百

處士魯孔徵子闕一二百河南平陰樊文高二百

右韓勅碑陰隸釋所載凡六十有二人較予家

舊搨本闕三十有八人隸釋始曲成侯王嵩終

洛陽王敬予家本則始涿郡太守魯應次公終

河南樊文高又有大不同者豈隸釋得之傳錄

故有此誤要當以搨本爲是抑此及史晨後碑

毆陽公最號博古皆未之見唯趙氏金石錄有

之

漢泰山都尉孔宙碑

君諱宙字季將孔子十九世之孫也天姿醇嘏齊聖
達道少習家訓治嚴氏春秋緝熙之業旣就而閨闕
之行允恭德音孔昭遂舉孝廉除郎中都昌長祗傳
五教尊賢養老躬忠恕以及人兼禹湯之非已故能
興朴闕二彫幣濟宏功於易簡三載考績遷元城令
是時東嶽黔首猾夏不闕三祠兵遺畔未寧乃擢君
典戒以文修之苟月之間莫不解甲服罪闕三擢田
峻喜于荒圃商旅交乎險路會鹿鳴於樂崩復長幼

於酬酢

闕三字

稔會遭篤病告困致休得從所好年六

十一延熹六年正月乙未

闕三字

疾貴速朽之反真慕

寧險之遺則窀夕不華明器不設凡百卯高

闕三字

述

於是故吏門人乃共陟名山采嘉石勒銘示後俾有

彝式其辭曰

於顯我君懿德惟光紹聖作儒身立名彰貢登王室

間

闕字

是更夙夜

闕二字

在公明明乃綏三縣黎儀以康

於天時靡撫茲岱方

闕一字

彼凶人覆俾

闕二字

南畝孔

饁山有夷行豐年多黍稱彼兕觥帝賴其勳民斯是

皇疾

闕五字

乃委其榮忠告懇勲屢省乃聽恭儉自終

簠簋不陳生播高譽沒垂令名永矢不刊億載揚聲
延熹七年七月戊闕造

門生故吏名

門生鉅鹿瘦陶張雲字子平門生鉅鹿瘦陶趙政字
元政門生鉅鹿廣宗捕巡字升臺門生東平寧陽韋
勳自幼昌門生魏郡館陶張上字仲舉門生魏郡館
陶王時字子表門生魏郡陰安張典字少高門生魏
郡魏孟忠字待政門生魏郡魏李鎮字世君門生魏
郡館陶吳讓字子敬門生魏郡館陶文儉字元節門
生魏郡館陶鄉瑱字仲睢門生魏郡鄴叔香字伯子

門生東郡東武陽梁淑字元祖門生東郡衛公國趙
恭字和平門生東郡東武陽張表字公方門生東郡
東武陽滕穆字奉德門生東郡樂平桑演字仲厚門
生東郡樂平靳京字君賢門生東郡樂平梁布字叔
光門生東郡樂平桑顯字伯異門生陳留平邱司馬
規字伯昌門生安平下博張祺字顛松門生安平下
博張朝字公房門生安平下博蘇觀字伯臺門生安
平堂陽張琦字子異門生北海安邱齊納字榮謀門
生北海都昌呂升字山甫門生北海劇秦麟字伯麟
門生北海劇如廬浮字遺伯門生北海劇薛鄒字勝

輔門生北海劇高冰字季超門生濟南梁叔趙震字
鄒政門生濟南梁鄒徐璜字幼文門生濟南東平陵
吳進字升臺門生甘陵廣川李都字元章門生甘陵
貝邱賀曜字升進門生魏郡清淵許祺字升明門生
魏郡館陶史崇字少賢門生魏郡館陶孫忠字府文
門生東郡樂平盧精字子節門生任城任闕二字景
漢門童安平下博張忠字公直故吏北海都昌逢祈
字伯熹故吏北海都昌雍章字文理故吏北海都昌
魏稱字文長故吏北海都昌呂規字元規故吏泰山
費魚淵字漢長故吏泰山華母樓覬字世光故吏泰山

山南城禹規字世舉故吏泰山南武陽蕭誨字伯謀
故民泰山費淳子黨字季闕弟子北海劇陸暹字丞
輔弟子陳留襄邑樂禹字宣舉弟子下邳下邳朱班
字宣闕弟子東平寧陽周順字承闕弟子沛國小沛
周升字仲甫弟子魯國文陽陳襄字聖博弟子汝南
平輿謝洋字子讓弟子山陽瑕邱丁瑤字實堅弟子
魯國戴璋字元珪弟子魯國卞王政字漢方

右孔宙碑陰不云碑陰而云門生故吏名此漢
碑中之僅見者前碑云故吏門人陟山采石勒
銘示後則此所載皆其人也今按宙門生四十

二人門童一人弟子一人故吏八人故民一人
隸釋謂漢儒開門授徒親受業者則曰弟子次
相傳授則曰門生未冠則曰門童總而稱之亦
曰門生舊所治官府其掾屬則曰故吏占籍者
則曰故民非吏非民則曰處士素非所蒞則曰
義士義民此皆讀漢碑者之所當知而隸釋人
間少傳故著之

金石古文卷四

金石古文卷五

成都 楊慎 輯 綿州 李調元 校定

漢博陵太守孔彪碑

君諱彪字元上孔子十九世之孫潁川君之元子也
君少履天姿自然之匹帥禮不爽好惡不愆考衷度
衷修身踐言龍德而學不至於穀浮游塵埃之外矚
焉汜而不俗郡將嘉其所履前後聘召蓋不得已乃
翻爾東帶宏論窮理直道事人仁必有男可以託六
授命如毛諾則不宿美之至也莫不歸服舉孝廉除
郎中博昌長疾病留宿闕遷闕京府丞未出京師遭

大君憂泣踰臯魚喪過乎哀謹畏舊章服竟還署試

拜尚書侍郎無偏無黨遵王之素薦可黜否出

闕二字

度日恪位佇所在祇肅拜治書御史膺臯陶之

闕一字

恕

闕二字

參之

闕五字

律祇用既平

闕

博陵太守郡阻山

闕二字

以饑饉斯多草竊罔不

闕

賊劉

闕一字

張丙等白

日攻剽坐家不命君下車之初

闕

五教以博

闕

削四

凶以勝殘乃

闕三字

爰尚桓桓拯馬蠲害醜類已殫路

不拾遺斯民以安發號施憲每合天心

闕

之所惡不

以強人義之所欲不以

闕三字

姓樂政而歸于德望如

父母順如流水遷下邳相河東太守舉此

闕二字

君子

風也未怒而懼不令而從雲行雨施

關二

大河海內

歸公卿之任矣勞而不伐有實若虛固執謙需以病

辭官去位闕

關

以孝竭

關

餘暇徧徠彈琴擊磬

關二

卅九建寧四年七月辛未

關三

哀哉魂神超邁寂兮

冥冥遺孤切絕于嗟想形

關二

哀遠念不欲生羣臣

號咷靡所復逞夫逝往不可追兮功

關三

識惟君之

軌迹兮如列宿之錯周易建八卦撥着數辭述而不

作彭祖賦詩皆讚所見于時頌

關二

是

關

吏崔

王沛等伏信好古敢詠顯

關

乃刊斯石欽銘洪基昭

示後昆申錫鑒思其辭曰

穆穆我君大聖之胄惇懿尤元獻其元秀惟嶽降精

誕生忠良奉應郡貢亮彼我闕克明王道辯物居方

周闕四

也匹名朝無秕政直哉惟清出統華夏化以

典成闕

猾殄迸賢倚闕

庭帝重乃勛自

闕二

征所臨

如神闕六

之翰先民是程宜乎三事金鉉利貞而絜

白駒俾世憤惻當享眉耆莫匪爾極

闕三

邈矣不

意于嗟悲兮

闕三

息漉漉庶幾復焉所力咨乎不朽

沒而德存伊尹之休格于皇天惟我君績表于丹青

永永無沂與日月并于嗟

闕二

于以慰靈

孔彪碑陰

故吏司徒掾博陵安平崔烈字威考故吏齊闕博陵
安平崔恢字行孫故吏桑氏令博陵安平王沛字公
豫故吏司空掾博陵安國劉德字伯桓故吏外黃今
博陵安國劉揚字子長吏白馬尉博陵故博陵齊智
字子周故吏五官掾博陵安平劉麟字幼公故吏五
官掾博陵安平王瑤字顯祖故吏五官掾博陵安平
孟循字敬節故吏五官掾博陵高陽史應字子聲故
吏五官掾博陵南深澤程祺字伯友故吏五官掾博
陵南深澤程祚字元祐故吏五官掾博陵安國劉機

字闕閣

漢司隸校尉魯峻碑

君諱峻字仲巖山陽昌邑人其先周文公之頌胄

關二

字

伯禽之懿緒以載于祖考之銘也君則監營謁者

之孫修武令之子體純和之德秉仁義之操治魯詩

兼通顏氏春秋博覽羣書無物不看學爲儒宗行爲

士表漢關始住佐職牧守敬恪恭儉州里歸稱舉孝

廉除郎中謁者河內太守丞喪父如羣禮司徒府舉

高第侍御史東郡頓邱令視事四年比縱豹產化行

如流遷九江太守

關

殘酷之刑行循吏之道統政

關

載穆若清風有黃霸召信臣在潁南之歌以公事去

官休神家術未能一暮爲司空王暢所舉徵拜議郎

太尉長史御史中丞延熹七年二月丁卯拜司隸校

尉董督京輦掌察羣

闕一字

彌細舉大樵然疏發不爲

小威以濟其仁彌中獨斷以效其節案奏

闕

公彈紕

五卿華夏祇肅佞穢者遠遭母憂自乞拜議郎服竟

還拜屯騎校尉以病遜位守疏廣止足之計樂於陵

灌園之潔閉門靜居琴書自娛年六十一熹平元年

闕

癸酉

卒明年四月庚子葬於是門生汝南干

闕

沛

國丁直魏郡馬萌勃海呂圖任城吳盛陳留誠屯東

郡夏侯宏等三百廿人追惟在昔游夏之徒作諡宣

君曰忠惠父息獻不才弱冠而孤承堂弗構析薪弗

何悲蓼莪之不報痛昊天之靡嘉

闕一字

企有紀能不

號嗟刊石敘哀其銘曰

巖巖山岳礪落彰較棠棠忠惠令德孔爍命

闕時生

雅度宏綽允文允武厥姿烈遠內懷溫潤外撮強虐

督司京師穆然清邈當

闕

緄職爲國之權匪究南山

遐邇切惻凡百君子欽謚嘉樂永傳童齡喚矣昀昀

右漢司隸校尉魯峻碑水經注以峻爲恭趙氏

謂方輿志寰宇記皆作峻而辨水經之誤予家

舊藏此碑峻字明白可識趙氏果有其本何乃

不知而必欲證之以地里書也歐陽公謂峻最
後爲屯騎校尉而碑首題云司隸校尉莫曉其
義隸釋云漢人碑志或以所重之官揭之司隸
官尊而職清非列校可比故書之也此足以祛
歐公之惑鄭夾漈又謂此碑書於蔡邕按徐浩
古迹記其敘邕書惟三體石經西岳光和殷華
馮敦數碑及考其他字書亦未聞邕嘗書此不
知鄭氏何所據也

魯峻碑陰

故吏河內

闕一
字

官

闕一
字

幼流

闕三
字

故吏九江壽春陳

龔伯闕一五百故吏九江壽春任闕一孝長五百故

吏東郡領兵許踰伯通五百門生沛國丁良闕一榮

千門生勃海闕二呂闕一世階千門生東郡汝陽敢

敦登高千門生汝南召陵干商明公五百門生南陽

新野闕一顯文闕一五百門生平原闕一路龍顯公

五百門生任城樊兒雄太平五百門生平原樂

陵路福世輔三百門生魏郡斥邱李牧君伯三百

門生魏郡繁陽王輔子助三百門生河東郡闕一陽

闕二文智三百門生汝南汝陽郡立闕二三百門生

東郡闕一邑闕三松二百門生東郡闕一平闕四二

百門生東郡樂平闕一顯闕二一百門生東郡樂平

闕四二百門生魏郡內黃闕四三百門生東郡闕一

陽王闕一少闕一二百門生汝南潁強尹稜闕二

百生門汝南潁強尹顥闕二二百門生勃海南皮劉

扶節闕一二百門生勃海南皮劉盛興闕二二百門生

河間阜成東鄉農子闕一二百門生河間阜成東鄉

恭公二百門生平原西平昌劉本景闕一二百門生

平原張謙伯讓二百門生陳留尉氏夏統子思二百

門生濟陰乘氏許仁伯德二百門生濟陰闕一狐周

維元興二百義士梁國寧陵及強強良二百

右魯峻碑陰毆陽公趙明誠皆失收錄至洪丞
相隸釋於漢碑搜羅殆盡而亦復遺焉予家此
碑不特人間少有且文字龕完可讀惜不三公
見之

漢北海相景君碑

惟漢安二年仲秋

闕二字

故北海相任城景府君卒嗚

呼哀哉國

闕二字

寶英彥

闕一字

疇列宿虧精晚學後時

子何穹蒼布命授期有生有死天寔爲之豈夫仁哲
彼克不遺於是故吏諸生相與論曰上世羣后莫不
流光闕於無窮垂芬燿於書篇身歿而行明體亡而

名存或著形像於列圖或繫頌於管弦後來永其烈
竹帛敘其勳乃作誄曰

伏惟明府受質自天孝弟淵懿帥禮蹈仁根道核藝
抱淑守真皐白清方克已治身寔柔寔剛乃武乃文
遵考孝謁假階司農流德元城興利惠民強禦改節
微弱蒙恩威立澤宣化行如神帝嘉厥功授以符命
守郡益州路遐戀親躬作遜讓夙宵朝廷建英忠讜
拜秩東衍墮追嘉錫據北海相部城十九鄰邦歸向
分明好惡先以敬讓殘偽易心輕黠踰竟鴟梟不鳴
分子還養元元鰥寡蒙祐以寧蓄道修德闕祉以榮

紛紛合儀明府體之仁義道術明府膺之黃朱邵父
明府三之台輔之任明府宜之以病被徵委位致仕
民闕思慕遠近搔首農夫釋耒商人空市隨輦飲淚
奈何朝廷奪我慈父去官未旬病乃困危珪璧之質
臨卒不回獻闕霄絕奄忽不闕孝子慙悞顛倒剝摧
遂闕克寤承潛長歸州里鄉黨隕涕奔哀故吏怛恒
獻闕一何四海冠蓋驚慟傷懷大命闕期是惟天
明主設位明府不就臣子欲養明府弗留嗚呼哀

哉

辭曰考績幽空

闕三字

兮

闕四字

翔議郎兮再命虎將綏

元元兮規英架謨主忠信分羽衛藩屏撫萬民兮

闕四

字恩闕二字闕今宜參鼎輔闕幹正兮不永康壽弃臣

子兮仁敷海外著甘棠兮闕石勒銘闕不亡兮

右北海相景君碑金石錄云在濟州任城縣蓋

任氏在漢為任城人也予按濟州即今之濟寧

州今碑乃在州學不知何年移置於此通志金

石畧以不知其地故直云未詳姚江謝中舍大

中近過濟寧搨以見惠子家自祖宗來藏碑頗

富兼以予好收錄中間得於朋友之助者十常

四五如此碑是也

北海相景君碑陰

故闕字一 中部督郵都昌羽忠字定公故門下督盜賊

劇闕字一 頌字闕一 遠故門下議史平昌蔡規字仲舉

故門下書佐 營陵孫榮字世榮故門下書佐淳子

逢 訢字闕一 成故騎吏劇 晉麟字 敬石故吏

朱虛孫徵字武闕一 故吏營陵薛逸字伯踰故吏營

陵闕字二 字中闕一 故吏都昌呂福字益闕一 故吏都

昌強闕字一 字光闕一 故書佐都昌羽質字孟闕一 故

書佐闕字一 虛闕字二 字君大故書佐闕一 壽淳子闕四

故書佐營陵徐昌字昌善故書佐都昌闕一 彤字闕一

字甫故書佐淳于孫悝字元闕一字故書佐營陵鍾顯字

字闕一寶故書佐東安平闕一字廣字廣宗故書佐劇紀

政字世堅故書佐淳于孫眺字威光故修行都昌台

邱暹字世德故修行都昌董方字季方故修行營陵

田闕一字字漢興故修行都昌闕二字字闕一字久故修行

營陵闕二字字護宗故修行營陵闕一字暹字武闕一字故

修行營陵臨照字景耀故修行都昌張駿字臺闕一字

故修行營陵淳于登字登成故修行營陵顏理字中

理故修行營陵水邱邵字君闕一字故修行都昌呂興

字世興故修行都昌逢進字世安故書佐劇徐德字

漢昌故書佐劇姚進字元豪故書佐劇邴鍾字元鍾

故書佐都昌張翼字元翼故修行都昌張闕一字季

遠故修行劇中闕一字季遠故修行平闕二允字伯

允故修行淳于趙尚字上卿故修行都昌段晉字世

節故修行都昌齊晏字闕一子故午營陵闕一遷字

世達故午營陵田敏字元成故午淳于董純字元祖

故午營陵縹良字世騰故午朱虛炅詩字孟道故午

都昌呂邱遷字孟堅故闕二都昌齊冰字文達故闕二

都昌張亮字元行三年服凡八十七人豎建

闕二虎闕二故臣吏慎終追遠闕六墳園闕二禮備

陵成

闕一字

立樹列既就聖典有制三

闕三字

墓側永懷

闕十二字

遺辭以明

闕三字

靈瑕顯降吾嘉祐

漢敦煌長史武班碑

建和元年太歲在丁亥二月辛巳朔廿叁日癸卯長

史同

闕下

郭煌長史武君諱班字宣張昔殷王武丁久伐鬼方

元功章炳勳藏王府官族分折因以為氏焉武氏蓋

其後也適周遐邇歷世曠遠不隕其美漢興以來爵

位相踵

闕

朝忠臣君幼

闕

顏閔之

闕一字

質長敷游夏

之文學慈惠寬

闕

孝有元妙苞羅術藝貫洞聖

闕

博

兼闕二 耽綜典籍闕二 純求福不回清聲美行闡形

遠近州郡貪其高賢闕二 請以闕二 歲舉闕 翼紫宮

字闕二 詔除光顯玉室有闕 於國帝庸嘉之掌司古闕

領校祕鄭研闕 幽微追昔劉向辨賈之徒北闕 萬矣

時戎闕二 匡正一闕二 朝廷惟憂闕二 有司闕二 舉

君班到官之日闕 癘吏士孝虎之怒薄伐闕九 竝百

姓賴之邦域既寧久勞于外當還本朝以敘左右以

永嘉元年闕 月闕 日遭疾不闕 哀闕 於是金鄉長河

間高陽史恢等追惟昔日同歲郎署感闕 為自古在

昔先聖與人闕二 興替闕二 人存生勞死哀是闕 萬

年伊君遺德闕孔之珍故闕石銘碑以旌明德焉其

辭曰

於惟武君允德允恭受天休命積社所鍾其在孩提

岐嶷發蹤謙闕守約唯誼是從孝深凱風志潔羊羔

樂是闕二恬此闕光孳孳臨川闕見闕牆庶仰其首

微元妙通闕然清闕六升闕為帝股肱扶助大和萬

民闕一蒙顯宗闕二史官書功昊天上帝降茲鞠凶

晬忽徂逝闕四不享闕考大命闕二百遺惟闕后帝

感傷學夫喪師士女悽愴闕表金門令問不忘垂闕

後昆萬載歎誦

尚書丞沛國蕭曹之闕宣成武令中山安熹曹种闕

字豐令下邳良成徐崇闕二故陳留府丞魯國魯闕

字防東長齊國臨菑闕紀伯允書此碑嚴祺字伯會

金石古文卷五

金石古文卷六

成都 楊慎輯 綿州 李調元 校定

漢執金吾丞武榮碑

君諱榮字含和治魯詩經章句關續傳講孝經

論語漢書史記左氏國語廣學甄微靡不貫綜久遊

太學藐然高厲鮮於雙匹學優則仕爲周書佐郡曹

史主簿督郵五官掾功曹守從事年卅六汝南蔡府

君察舉孝廉關二郎中遷執金吾丞遭孝桓大憂屯

守立武威哀悲慟加遇害氣遭疾墮靈關四君卽吳

郡府卿之仲子燉煌長史之次弟也廉孝相承亦世

載德不忝

闕四字

命

闕不竟台衡蓋觀德於始述行於

終於是刊石勒銘垂示無窮其辭曰

天降雄產資才卓茂仰高鑽堅允文允武內

闕一字

署外

闕

師旅

闕

勒屯守舊威

闕

武

闕

旗絳天雷震電

舉軟耀赫然陵惟哮虎當遂股肱

闕

之元輔天何不

弔降此

闕

咎癘乎我君仁如不壽爵不副德位不稱

功感懷傷愴遠近哀同身沒

闕二字

萬世諷誦

右漢執金吾丞武榮碑歐陽公謂其文字殘缺

不見卒葬年月及氏族所出予家本殘缺與歐

公同而隸釋所載者則文往往可讀如云君卽

吳郡府卿之子燉煌長史之次弟此乃其氏族之所出也但碑文簡短不書卒葬年月歐公特未之知耳

漢荊州刺史度尚碑

君諱尚字博平其先出自顓頊與楚同姓熊嚴之後闕亦世掌位統國法度秦兼天闕和之純質秉黃中

之正性智含淵藪仁隆春煖義高秋雲行潔冰霜慷慨壯厲臨闕休譽固已著矣及其典牧必招振賢才

抽拔幽逸選召所任極當世之秀士養民有闕令聞

彌崇暉光日新可謂盛德者已初奉歲計拜郎中除

上虞長玄化潛洞百姓闕數縣恩信竝宣令行禁止

以從父憂去官更舉孝廉爲右校令是時南蠻蠢動

擢拜闕醜殊俗賓服遠人用綏封右鄉侯遷遼東太

守旬月之間薺貉寧輯會楊賊畔於闕拜中郎將料

敵制勝威謀合神持重優於營平深入則輕冠軍附

士渥於李廣御眾闕同滋味必達井辨幕然後飲舍

惠以厚下說以犯難是故所征輒克師徒無頽闕寇

殄殪干戈載戢走馬以糞朝貪厥重復拜荊州刺史

以故秩居冊書慰薦因賜闕之荆域號慕雖周人之

思召伯弗此踰也於是故吏感清廟之頌歎斯父之

詩乃闕曰於惟我侯允懿允明文武是該克忠克真粵

初發藻在彼上虞邁種厥德闕矣匪祿是榮無言不

讐帝揚厥聲俾作配闕往撫于荆撫荆惟何南夏是

闕邦家截彼海外績莫匪嘉天生我侯實爲民望心

乎其愛四方是仰如何不永闕而不死芳烈遺兮

永康元年歲在鶉尾龍集丁未時維闕歲闕

右漢荊州刺史度尚碑尚後漢書有傳碑今在

徐州州治蓋成化間吾鄉顧君崇善以工部郎

中管理河道見其淪於湖陵城闡出之遂置於

此按酈道元水經注云湖陵城東有度尚碑則

自漢至晉自晉至今而此碑未嘗徙也又隸釋云政和中巡檢王當世見其在湖陵荒野遷之官廨後邑令滕君欲徙碑於沛舟載而覆沉沒不出又其後劉宗儀攝令乃立之於使星亭然不知此碑何年復淪入水中今惟存其首漢荊州刺史度侯之碑九字其餘文字悉皆漫滅特頽然斤石而已蓋闢水撞激日久其字之不存宜也

漢桂陽太守周府君碑

桂陽太守周府君者徐州下邳人也諱憬字君光體

性敦仁天資篤厚行興閨門名闕州里舉孝廉拜尚

書侍郎遷汝南固始相遂拜桂陽廼宣魯衛之政敷

二南之澤政以德綏化猶風騰撫集烝細闕綏有方

進則貞直退則錯枉崇舉濟濟吉士克朝招訓闕蒙

開誘六蔽君子道長小人道消信感神祇靈瑞符闕

嘉穀生於野奇草像闕一蒲異根之樹超然連理於

此闕時邦域惟寧郡又與南海接此商旅所臻自瀑

亭至乎曲紅壹由此水其水源也出於王禽之山山

蓋隆闕三字于天泉肇沸踊發射其顛分流離散爲十

二川彌陵隋隨丘阜錯連隅陬壅遏未由騁焉爾乃

貫山鑽石經

闕四

揚爭怒浮沉潛伏虵龍咭屈禮隆

鬱浥千渠萬澮合聚谿澗下迄安

闕一

六瀧作難湍

瀨

闕二

字 泣云潺湲雖詩稱百川沸騰高岸爲谷深谷

爲陵蓋莫若斯天軌所經惡得已改其下注也若奔

車失戀狂牛無縻

闕

勿荒忽矚睦不相知及其上也

則羣輩相隨檀柁提

闕

唱號慷慨沈深不前其成敗

也非徒喪寶玩隕珍奇替珠貝流象犀也往古來今

變甚終矣於是府君乃思夏厚之遺訓

闕

應龍之畫

傷行旅之悲窮哀

闕

字 一人困屣感蜀守冰珍絕犁堆

嘉夫味淵永用夷易廼命良吏

闕

字 一

帥壯夫排殯

闕

字石投之寥

闕二
字

高填下鑿截回曲弼水之邪性順

導其徑脉斷碩濫之電波弱陽侯之汹涌由是小蹊

乃平直大道允通利抱布負絲交易南至升涉周旋

功萬於前除昔

闕二
字

樹塞於茲雖非龍門之鴻績亦

人君之德宗故船人嘆於水渚行旅語於塗陸孔子

曰禹不決江疎河吾其魚矣於是熹平三年歲在攝

提仲冬之月曲紅長零陵重安區祉字景賢遵承典

憲宣揚德訓帥禮不越欽仰高山乃與邑子故吏龔

臺郭蒼龔雒等僉工擊石建碑于瀧上勒銘公功傳

之萬世垂示無窮其辭曰

乾坤部兮建兩儀剛柔分兮有險夷咨中嶽兮穆崔

嵬嘆衡林兮獨傾虧增陵峭兮甚樞倚鮫莫涉兮禹

不規仰王禽兮又唾峴俯瀧淵兮恒以悲岸參天兮

無路蹊石縱橫兮流洄洄波隆隆兮聲若雷或抱貨

兮以從利或追恩兮有義汜自楫兮有不避闕躬軀

兮於立池委性禽兮於芒緇情寒懷兮不皇計忽隨

流兮殆忘歸懿賢后兮發聖莢閉不通兮治斯谿歷

巨石兮以湮填開切闕字一兮遵曲機摧六瀧兮弱闕五

字兮散其波威怒定兮混瀾息聊啾兮闕字五逝瀾兮

蛟龍藏陸老昌兮臚人歌名冠世兮超踰偷今稱闕

兮耀流沙功斐斐兮鏡海裔君乎君壽不訾

此碑元季廬陵陳謨跋謂漢刻本在隴上唐重刻本在曲江廟中不知何時徙置郡學韶州守錢旭旣新府治以韶在漢屬桂陽乃徙置之後楊文貞公跋亦云碑在韶州府治按府治今爲王府碑由是仍徙曲江廟中東廣漢碑絕少所有惟斯而已

周府君碑陰

故曲紅長零陵重安區祉字景賢故含涯長南郡

闕

字蒼陸字

闕

夏故澧陽守長南平丞長沙漢昌蹇祇

字宣節故行事來陽華夏字漢威故荊州從事曲紅
龔臺字少謙故荊州從事曲紅郭蒼字伯起故荊州
從事柳王鼎字季尼故南部督郵曲紅龔雒字闕然
故吏曲紅鄧音字孝直故吏曲紅朱隲字義德故吏
曲紅張涼字子才故吏曲紅龔達字叔通故吏曲紅
黃部字世尼故吏曲紅周蓋字伯嘗故吏曲紅黃晏
字子齊故吏曲紅馬珪字元序故吏曲紅潭承字曼
升故吏曲紅劉鵠字季產故吏曲紅黃祺字淑仁故
吏曲紅周習字仲鸞故吏曲紅劉越字子省故吏柳
褚禧字闕讓故吏來陽蔡闕字已明故吏涇陽左尉

零陵泉陵

闕三字

故吏滇陽劉萌字仲

闕

故吏滇陽左

勝字仲升故吏滇陽左劄字妙舉故吏滇陽宋碩字

子張故吏含涯堯禹字公制故吏含涯張邵字曼威

故吏含涯黃詳字伯節工師南陽宛王遷字子疆

漢衛尉衡方碑

府君諱方字興祖肇先蓋堯之苗本姓

闕二字

則有伊

尹在殷之世號稱阿衡因而氏焉

闕三字

土家干平陸

君之烈祖少以儒術安貧樂道履該顏原兼修季由

聞斯行諸砥仁癘

闕四字

土階夷愍之貢經常伯之賓

位左馮翊先帝所尊垂名竹帛考慮江太守兄鴈門

太守

闕三字

孝長發其祥誕降于君天資純懿昭前之

美少以文塞敦龐允元長以欽明耽詩悅書

闕三字

秋

仕郡辟州舉孝廉除郎中郎丘侯相膠東令遵尹鐸

之導保鄣二城參國起按班敘

闕三字

本肇末化速郵

置州舉尤異遷會稽東部都尉將繼南仲邵虎之軌

飛翼軫之旌操叅

闕三字

綏耒王之蠻會喪太夫人感

倍人之凱風悼蓼莪之劬勞寢闇苦

闕一字

仍闕上言

倍榮向哀礼服祥除徵拜議郎右平太守尋李廣之

在邊恢魏絳之和戎戎戢土佚費省巨億懷

闕四字

靜

有績遷潁川太守修清滌俗招拔隱逸光大茅茹國

外浮

闕一字

淡界繆動氣泄狂

闕五字

歸來洙泗用行舍

藏徵拜議郎遷太醫令京兆尹舊都餘化詩人所詠

竝有亡新君

闕四字

隆寬慄鶉火光物隕霜剿姦振滯

起舊存亡繼絕恩降乾太威肅剝坤本朝錄功入登

衛

闕二字

翼紫宮夙夜惟寅委蛇在公有單襄穆典謨

之風詔選賢良招先逸民君務在

闕

失順其文舉已

從政者退就勅巾永康之末君衛孝桓建寧初政朝

用舊臣留拜步丘校尉處六師之帥維時假階將授

袞職受任浹旬奄離寢疾年六十有三建寧元年二

月五日癸丑卒詔遣使

闕一字

弔賻禮百賓臨會莫不

失聲其年九月十七日辛酉葬蓋雅頌興而清廟肅

中庸起而祖宗闕故仲尼既歿諸子綴論斯干作歌

用昭于宣闕一以旌德銘以勒勳於是海內門生故

吏闕三采嘉石樹靈碑鐫茂伐祕將來其辭曰

峩峩我君懿烈孔純高朗神武歷世忠孝馮隆鴻軌

不忝前人寬猛不主德義是經韜闕綜頌温故前呈

攬英接秀踵迹晏平初據百里顯顯令聞濟康下民

曜武南會邊民是鎮惟闕三憂及退身叅議帝室剖

符守藩北靖闕二有闕有聲旋守中嶽幽滯以榮邁

種舊京闕四含澤戴仁闕二攸寧克長克君不虞不

陽維明維允燿

闕一
字

聲香能慙能惠剋亮天功入統

闕三
字

赳赳光光法言稽古道而後行兢兢業業素絲

羔羊閭閻侃侃頤頤昂昂何規履架金玉其相謇謇

王臣羣公憲章樂只君子

闕二
字

無疆銘勒金石

闕五
字

問

闕二
字

萬世是傳

金石古文卷七

成都 楊 慎 輯 綿州 李調元 校定

漢酸棗令劉熊碑

君諱熊字孟闕廣陵海西人也厥祖天皇大帝垂精

接感篤生聖明闕仍其則子孫享之分源而流枝葉

扶疏出王別胤受爵列土封侯載德相繼丕顯闕五

光武皇帝之玄孫廣陵王之孫俞鄉侯之季子也誕

生照明岐嶷踰絕長闕四柴守約履勤禮聖心叡敦

五經之瑋圖兼古業覈其妙行修言道闕五宜京夏

莫不師仰六籍五典如源如泉既練州郡卷舒委隨

忠貞

闕

效官

闕三

出省楊土流化南城政猶比辰衆

星所從三祀有成未臻我邦循東

闕

之惠抑

闕

禮官

賞進厲頑約之以禮博之以文政教如初慎徽五典

勤恤民殷

闕

心顧下

闕二

仁恩如冬日威猛烈炎夏

貪究革情清修勸慕德惠潛流豈芳旁布尤愍縣

闕

濟濟之儀孜孜之踰帥厲後學致之雍泮草上之風

土業勃然而興咸居今而好古雖未盡道善必有所

由處民之秉彛寔我劉父其人魯無君子斯焉取旃

允我劉父言善誘人講禮習聆匪徒豐學屢獲有年

闕

載充成神民協欣兩不相傷故德交歸焉自古在

昔先民有作洪勳則甄盛德闕刻表諸末世垂之罔

極褒賢表善揚幽拔微式序在位量能授宜官無曠

事闕字二爲正以卒爲更愍念烝民勞苦不均爲作正

彈造設門更富者不獨逸樂貧者闕順四時積和感

暘歲爲豐穰賦稅不煩寔我劉父吏民愛若慈父畏

若神明悔闕令德清越孤竹德牟產奇誠宜褒顯照

其憲則乃相闕咨度諏詢采摭諱言刊闕詩三章其

辭曰

清和穆鑠寔惟乾闕字一惟嶽降靈篤生我君服母獻

聖允鍾厥醇誕生岐嶷言協闕墳懿德震耀孝行通

神動履規繩文彰彪績成是正服以道德民

有父子然後有君臣理財正辭束帛戔戔闕夢刻像

鶴鳴一震天臨保漢寔生闕勳明試賦授夷夏已親

嘉錫來撫潛化如神其神伊何靈不傷人

猗歟明哲秉道之樞養闕之福惟德之偶淵乎其長

渙乎成功闕暇民豫新我闕通用行則達以誘我邦

賴茲劉父用說其闕澤零年豐黔首歌頌

淳于長夏承碑

君諱承字仲克東萊府君之孫太尉掾之仲子右中

郎將弟也累葉牧守印紱典據十有餘人皆德任其

位名豐其爵是故寵祿傳于歷世策薰著于王室君
鍾其美受性淵懿含和履仁治詩尚書兼覽羣藝靡
不尋暢州郡更請屈已匡君爲主簿督郵五官掾功
曹上計掾守令冀州從事所在執憲彈純糾枉忠潔
清肅進退以禮允道篤愛先人後已克讓有終察孝
不行大傅胡公歆其德美旌招俯就羔羊在公四府
歸高除淳于長到官正席流恩褒善糾姦示惡旬月
化行風俗改易輻軒六轡飛躍臨津不日則月皓天
不弔殲此良人年五十有六建寧三年六月癸巳淹
疾卒官嗚呼痛哉臣隸辟踊悲動左右百姓號咷若

哀考妣孩孤憤泣怛傷推勒銘金石惟以告哀其
辭曰

於穆皇祖天挺應期佐時理物紹縱光軌積行勤約
燕于孫子君之羣威竝時繁祉明明君德令問不已
高山景行慕前賢列庶同如蘭意願未止中遭寃友
不終其紀夙世賈祚早喪懿寶抱器幽潛永歸蒿里
痛矣如之行路感動儻竟有靈垂後不朽

漢西嶽華山廟碑

周禮職方氏河南山鎮曰華謂之西嶽春秋傳曰山
嶽則配天乾坤定位山澤通氣雲行雨施旣成萬物

易之義也祀典曰日月星辰所昭仰也地理山川所
生殖也功加於民祀以報之禮記曰天子祭天地及
山川歲徧焉自三五迭興其奉山川或在天子或在
諸侯是以唐虞疇咨四嶽五歲壹巡狩皆以四時之
中月各省其方親至其山柴祭燔燎夏商則未聞所
損益周鑒於二代十有二歲王巡狩殷國亦有事于
方嶽祀以圭璧樂奏六歌高祖初興改秦淫祀太宗
承循各詔有司其山川在諸侯者以時祀之孝武皇
帝修封禪之禮思登假之道廷省五嶽禋祀豐備故
立宮其下宮曰集靈宮壁曰存僊壁門曰望僊門仲

宗之世重使使者持節祀焉歲一禱而二祠後不承
前至于亡新帝用丘虛訖今垣趾營兆猶存建武之
元事舉其中禮從其省但使二千石以歲時往祠其
有風旱禱請所求靡不報應自是以來百有餘年有
事西述輒過享祭然其所立碑石刻紀時事文字靡
滅莫能存識延熹四年七月甲子農弘太守安國侯
亭汝南袁逢掌華嶽之主位應古制修廢起頓閱其
若茲深達和民事神之義精通誠至禱祭之福乃案
經傳所載原本所由銘勒斯石垂之于後其辭曰
巖巖西嶽峻極穹蒼奄有河朔遂荒華陽觸石興雲

雨我農桑資糧品物亦相瑤光崇冠二州古曰雝梁
馮于幽岐文武克昌天子展義巡狩省方玉帛之贄
禮與岱亢六樂之變舞以致康在漢中葉建設宇堂
山嶽之守是秩是望侯惟安國兼命斯章尊修靈基
肅共壇場明德惟馨神歆其芳遏禳凶札孳斂吉祥
歲其有年民說無疆袁府君肅恭明神易碑飾闕會
遷京兆尹孫府君到欽若嘉業遵而成之延熹八年
四月廿九日甲子就袁府君諱逢字周陽汝南汝陽
人孫府君諱璿字山陵安平信都人時令朱頡字宣
得甘陵郇人丞張昉字少游河南京人左尉唐佑字

君惠河南密人主者掾華陰王萇字德長

京兆尹勅監都水掾霸陵杜遷市石遺書佐新豐郭

香蔡書刻者潁川邯鄲公修蘇張工

闕君闕

漢立儒先生婁壽碑

先生諱壽字元考南陽隆人也曾祖父修春秋以大
夫侍講至五官郎中將祖父太常博士徵朱爵司馬
親夫安貧守賤不可營以祿先生童孩多奇岐嶷有
志挽髮傳業好學不厭不修廉隅不節小行溫然而
恭慨然而義善與人交久而能敬榮且弱之耦耕甘
山林之杳藹遁世無悶恬佚淨漠遲德衡門下學上

達有朋自遠見紳莘莘朝夕講習樂以忘憂郡縣禮
請終不回顧高位厚祿固不動心麤絺大布之衣糲
糝蔬菜之食蓬戶茅宇捲樞龕爨樂天知命權乎其
不可拔也是以守道識真之生音士高尚其事鄉邠州
鄰關親愛懷年七十有八熹平二年正月甲子不祿
國人乃相與論德處諡刻石作銘其詞曰

皇矣先生懷德惟明優於春秋立壘有成知賤爲貴
與世無爭渾德衡門禮滋醇義窮下不苟知我者天
身歿聲鬯千載作珍緜之日月與金石存

漢蕩陰令張君碑

君諱遷字公方陳留己吾人也君之先出自有周周
宣王中興有張仲以孝友爲行披覽詩雅煥知其祖
高帝龍興有張良善用蕭何在帷幕之內決勝負干
里之外析珪於留文景之間有張釋之建忠弼之謨
帝遊上林問禽獸所有苑令不對更問嗇夫嗇夫事
對於是進嗇夫爲令令退爲嗇夫釋之議爲不可苑
令有公卿之才嗇夫喋喋小吏非社稷之重上從言
孝武時張騫廣通風俗開闕一畿寓南苞八蠻西羈
六戎北震五狄東勒九夷荒遠旣殫各貢所有張良
輔漢世載其德爰旣且於君蓋其續縵緝戎鴻緒牧

守相係不殞高問孝弟於家中嘗於朝治京氏易聰
麗權略藝於從畋少爲郡吏隱練職位常在股肱數
爲從事聲無細聞徵拜闕一中除穀城長螿月之務
不閉四門鵬正之際休囚歸賀八月英民不煩於卿
隨就虛落存恤高年路無拾遺黎種宿野黃巾初起
燒平闕一市斯縣獨全子賤孔蔑闕一道區別尚書
五教君嵩其寬詩云愷悌君隆其恩東里潤邑君垂
其仁邵伯分陝君懿于棠晉陽珮璣西門帶苙君之
體素能雙其勛流化闕一基遷蕩陰令吏民頡頏隨
送如雲周公東征西人怨思奚斯讚魯孝父煩良前

喆遺芳有功不書後無述焉於是刊石整表銘勒萬載三代以來雖遠猶近詩云舊國其命惟新

於穆我君既敦既純雪白之性孝友之仁紀行來本蘭生有芬克岐有兆綏御有助利器不覲魚不出淵國之良幹垂愛在民蔽芾棠樹溫溫恭人乾道不繆唯淑是親既多受祉永享南山千祿無疆子子孫孫惟中平三年歲在攝提二月震節紀日上旬陽氣厥拊感思舊君故吏韋萌等僉然同聲賃師孫興刊石立表以示後昆共享天祚億載萬年

此碑予官京師時嘗於景太史伯時處見舊搨

本不及錄近得之友人文徵仲按隸釋云東漢及魏其碑到今可記者十才一二凡歐趙錄中所無者世不復有予生去宋數百年而此本兩見歐趙錄中蓋未嘗載隸釋并隸續亦無其文通志金石略所載碑目雖多然亦未之及乃知昔人之言未必可信而舊物之在天壤間者固不可盡謂之無也

金石古文卷八

成都 楊 慎 輯 綿州 李調元 校定

漢堂邑令費鳳碑

惟熹平六年歲格于大荒無射之月堂邑令費君寢

疾卒嗚呼哀哉於是夫人元第故

闕三字

守卜胤追而

誄之其辭曰

君體履柔溫和其如玉修孝友乎閭閻執忠謇於王

室立迹州郡仕更右職舉直措枉強禦

闕

貸貢孝三

署勛譽有則出宰近甸民懷厥德色斯輕翔翻然高

潔王人述職分

闕

班爵台

闕二字

招助鼎調物退已進

第不營榮祿栖遲歷稔項領滯畜鄣土不庭黔民作

闕一命君闕二政化闕行逆善遷惡三替致道有耻

且格文守旌功轉在堂邑垂拱不言而民帥伏三時

之間卒以闕洽昊天不弔命也早歿春秋六十六黎

儀瘁陽泣涕漣灑豈愛哉躬命不可贖臨終迷闕三

內發祖業畀田畝直一金推予第息辭位讓財行義

高邵卓不可及名實相副有始有卒闕二人善憲方

切惻

故吏故鄣施業字世堅義民堂邑賊忠忠年十有一

慈考早隕喪以備於禮制蓬首而闕三壤而消辟地

闕三 行毋氏以闕四而悼傷服闕菲五五纒杖莫未

除廣陵之郡守東海闕二聞寢疾而終卒凡百普悲

闕四舜化北屋之餘慶隨闕棺柩車哀以而逆之祖

載已畢託還返其故鄉君闕其節操悲其有闕一每

以闕五其老親忠闕二君厚德念君之仁恩聞君之

隕隧剝斷而辛酸復截纒麻杖闕君之柩棺扶號而

竭闕泣涕其闕八甫於岐山闕一其從之迷君而到

官上書而薦君盡禽息之闕三君之闕三君闕三君闕七

字於山闕列種嘉奇樹持爲之潤解忠業興闕二猶

君恩使然雖君有大化孰能爾者難子喪之終闕三

思其顏而

闕

死可贖不愛

闕

二人今君

闕

於彼卓譎

而超吏民慕高蹤來者其如雨偉名建

闕

一石垂示

於

闕

門下功曹徐侃字元節主簿呂嘉字元

闕

主史陳信

字聖舉主記史

闕

忠字建臺門下游徽

闕

二字叔騰

門下賊曹

闕

字聖臺門下吏曹助字仲臺

闕

吏呂

常字孝讓從掾位徐超字元貴

漢堂邑令費鳳別碑

君舅家仲孫甘陵石勛字子才載馳載驅來奔于喪
庭肝摧意悲感切傷心瞻彼碑誅懷之好音司馬慕

藺相南容復白圭仰之以彌高鑽之而彌堅不堪哀
且思敘詩之一篇庶幾昔子夏起夫子之所言其辭
曰

君諱鳳字伯蕭梁相之元子九江太守之長兄也世
德襲爵銀艾相亞遐祖之鴻軌拓前代之休蹤邈
逸越而難繼非羣愚之所頌仁義本於心慈孝著於
性言不失典術行不越矩度清潔皦爾渥而不澤恤
憂矜戾施而不記由近及遠靡不覆載故能闡令名
而雲騰揚盛聲而風布踐郡右職三貢獻計辟州式
部忠以衛上漢安二年吳郡太守東海郭君以君有

透虵之節自公之操年卅一舉孝廉拜郎中除陳國

新平長神化風靡惠以流下靜而爲治匪煩匪擾乾

乾日櫻 此黔首功成事就色斯高舉宰司委職位

思賢以自輔立懿守謙虛白駒以闕一隰丹陽有越

寇没闕四字 舍君封理之試守一鄣長蓋危亂有不讓

又畏此之闕二字 而闕牧爰止其帥旅鳴若飛鷹闕一

字 若夫虓虎疆者緩以德弱者以仁撫簡在上帝心

功訓而特紀轡輿宰堂邑基月而致道祝闕四字 遂據

于卿尹中表之恩情兄弟與舅舅薦與女蘿性樂松

之茂好聞君顯令名舉宗爲歡喜不悟奄忽終藏形

而匿景耕夫釋耒耜桑婦投鉤莒道阻而且長望遠

淚如雨策馬循大路褰裳而涉洧

闕二

歌

闕二 離思

黃鳥集于楚惴惴之臨穴送君於厚土嗟嗟且傷

每食

闕

悲不絕夫人篤舊好不以存亡改文平感渭

陽悽愴益以甚諸姑咸辟踊爰及君伯姊孝孫字元

宰生不識考斐惟厥祖恩蓬首斬續杖追世所不

爲流稱於鄉黨見吾若君存剝裂而不已一別會無

期相去三千里絕翰永忼慨泣下不可止

漢溧陽長潘乾校官碑

蓋漢二百八十有亡載

闕三

于

闕四

銘工著斯金石

昇誄曰

溧陽長潘君諱乾字元卓陳國長平人蓋楚太傅潘

崇之木緒也君稟資南

闕一之字

德之節操髫髻

闕一字敏

闕一字學典謨祖講詩易剖演奧藝外覽百家

衆

闕一字

契聖抱不測之謀秉高世之介屈私趨公卽

仕佐上郡位旣重孔武赴著疾惡義形從風征暴執

訊獲首除曲阿尉姦剗猶寇自善歡履孤竹之廉禽

蹈公儀之絜察廉除茲初厲清肅賦仁義之風

闕三字

之跡垂化放乎岐周流愛雙乎

闕二字

親賢寶智進直

退慝布政優優令儀令色獄無嗟吁之寃野無叩匈

之結矜孤頤老表孝貞節重儀輕利制戶六百省無

正繇不責自畢百姓心歡官不失實於是遠人令聲

景附樂受一廛既來安之闕一役三年惟泮宮之教

反闕一俗之禮構修學宮宗懿招德既安以寧于侯

用張籩豆用陳發彼有的雅容闕一閑鍾石縣矣于

胥樂焉乃作敘曰

翼翼聖慈惠我黎蒸貽我潘君平茲溧陽彬文赴武

扶弱抑疆闕一刈孽雄流惡顯忠咨疑元老師賢作

朋修學童冠琢質繡章寔天生德有漢將興尚且在

昔我君存今闕一此龜艾遂尹三梁永世支百民人

所彰子子孫孫昇爾熾昌

丞沛國銍趙勳字范伯左尉河內汲童竝字公房右

尉豫章南昌程陽字孝遂時將作吏名戶曹揚准議

議曹掾李就議曹掾桓檜戶曹史賀

闕一字

從掾位侯

祖主記史吳超門下吏吳訓門下吏吳翔門下吏時

球

光和四年十月己丑朔廿一日己酉造

漢校官碑宋紹興十一年溧水尉喻仲遠得於

固城湖濱置之官舍今在孔廟之大門右長樂

陳長方雖嘗碑其所得本末釋文則未之見碑

方雖嘗碑其所得本末釋文則未之見碑以靈
帝光和四年歲在辛酉造距今凡一千一百五
十三年番陽洪景伯先生出字爲之釋謂挈犂
爲黎畀爲俛楸爲野賚爲責剗去其刀賢去其
具于侯與豕侯通尚且爲太公周公可謂精審
有據其餘不可辨者尚有二十七字今觀首行
自三百字以下上下斯字凡十有六字比之洪
氏作釋文時又皆不可攷且如第二行之字之
下是禱字禱下闕一字有天字敏之上是克字
衆之下是儁字退之下是慝字役之上爲復反

之下爲失此之上爲卽皆隱隱可見洪則悉以爲闕又如旣安且寧則以爲呂寧梅檜則以爲桓檜豈當時誤於墨本而然耶溧陽志志謂元卓爲元貞是又以名乾而傳會也禧承乏於茲暇日與士友曹國傑摩挲久之得其二三因以洪先生釋文列於上僭附所見於其下勒諸樂石以補前修之所未及者餘尚俟博雅君子云至順四年龍在癸酉夏五月文學掾濟陰單禧

謹識

漢郎中鄭固碑

君諱固字伯堅老君元子也含中和之淑質履上仁

闕三字

孝友著乎閨門至行立乎鄉黨初受業於歐陽

遂窮究于典籍膺游夏之文學襄冉季之政事弱冠

仕郡吏諸曹掾史主簿督郵五官掾功曹入則腹心

出則爪耳忠以衛上清以自修犯顏謇諤造脉詭辭

加以好成方類推賢達善遠遁退讓當世以此服之

邗后珍瑋以爲儲舉先屈計掾奉我闕貢清珍冠乎

羣彥德能簡乎聖心延熹元年二月十九日詔拜郎

中非其好也以疾固辭未滿期限從其本規乃遘凶

愍年四十二其四月廿四日遭命隕身痛如之何先

是君大男子孟子有楊烏之才善性形於岐嶷

闕二見

於垂髫年七歲而天大君夫人所共哀也故建

闕共

墳配食斯壇以慰考妣之心琦瑤廷以爲至德不紀

則鍾鼎奚銘昔姬

闕二

武弟述其兄綜

闕四

行於蔑

陋獨曷敢忘乃刊石以旌遺芳其辭曰

於惟郎中實天生德頤親誨弟虔恭竭力教我義方

導我禮則傳宣孔業作世模式從政事上忠以自勗

貢計王庭華夏歸服帝用嘉之顯拜殊特將從睢意

色斯自得乃遭氛災隕命顛沛家失所怙國

闕忠直

俯哭誰訴仰號焉告嗟嗟孟子苗而弗毓奉我元兄

修孝罔極竟而有靈亦歆斯勒

漢廬江太守范府君碑

君諱式字

闕八字

功存有夏寔曰御龍

闕

昨商周世昭

其隆晉主夏盟有士會者光演弘謨翼崇霸業錫邑
命族闕范氏則其後爲也君稟靈醇之茂度體玄亮
之殊高徽柔懿恭明允篤恕九德靡爽百行淵備弘
道耽藝恢韜墳籍探頤研機罔深不入若乃立德隆
禮樹節寶真志諒足以弼國篤友足以輔仁用能昭
其洪懿聲克字旬接華彥於汝墳潤枯斃於荆漢超
管鮑之遐蹤信靈諱乎炳煥是以闕化泉流芳闕鴻

舊耀仁闡於權與濟俗侔乎皇訓郡公偉焉弓旌盈

路再讓考

闕二字

三府舉高第侍御史拜冀州刺史糾

剔瑕慝六教允施翰飛肅於鷹揚典刑

闕二字

軌闕帝

闕其勲遷廬江太守擬泰和以陶化昭八則以隆治

彌闕

弘略惠訓亡倦

闕二字

協闕

三齊闕

闕二字

清源之深

閔寶疏氏之至順以疾告辭韜光潛耀詠琴詩以寧

闕九

其猶充洽外內實紹德之與藪而儀民之淵表

也未亮三事

闕三字

終

闕六字

常山相暨子汜孫而胤嗣

罔極粵青龍三年正月丙戌縣長汝南薛

闕七字

感靈

罍之不饗思隆懿模以紹奕世乃興縣之碩儒咨典

謨之中闕同宗闕二之胄昭告祖考俾守厥祀本

著宣融之祚人神協休茂之慶焉禮也於是卿闕三

上計掾翟循州部泰山從事史翟邵等僉以爲郡雖

輝名載籍光颺前列而靈墳亡闕儀問靡述遂相與

略依舊傳昭撰景行刊銘樹墓以聲百世其辭曰

於昭上德實唐之胤誕表靈和蹈規履信窮神周覽

祇道之訓邁德徽猶鴻漸闕舊歲彼夸毗寶此醇懿

以文會友以仁翼闕敷化濟殖羣生以遂永言孝思

民之攸暨如何昊天不信其軌明德不報胤 亡紀

爰輯訓典詢璽髦士育茲赫闕以永遐祉詒厥孫謀

燿于萬祀

金石古文卷八終

金石古文卷九

人集

成都 楊慎 撰 羅江 李調元童山 校

光武濟陽宮碑

蔡伯喈

王室中微哀平短祚姦臣王莽偷有神器有十八年
罪盈惡熟天人致誅帝乃龍見白水淵躍昆澨破前
隊之衆矜二公之師收兵略地經營河朔於是羣公
諸將據河洛之文協符瑞之徵僉曰歷數在帝踐祚
允宜乃以建武元年六月卽位于鄗縣之陽五成之
陌祀漢配天罔失舊物享國三十有三年方內人安
蠻夷率服巡狩太山禪梁父皇代之遐迹帝者之上

儀罔不畢舉道德餘慶延于無窮先民有言曰樂樂其所自生而禮不忘其本是以虞稱媯汭姬美周原皇天乃眷神宮實始于此厥路藐哉所謂神麗顯融越不可尙小臣河尹瑋來在濟陽願見神宮追惟桑梓褒述之義用敢作頌其辭

赫赫炎天爰曜其暉篤生聖皇二漢之微稽虔虔則誕育靈姿黃夔作慝篡握天機帝赫斯怒爰整其師應期潛見扶陽而飛禍亂克定羣凶於夷匡復帝載萬國以綏巡于四岳展義省方登封降禪升于中皇爰茲初基天命孔彰子子孫孫保之無疆

汝南周巨勝碑文

君諱總字巨勝陳留太守之孫光祿勳之子也君應
白乾之淳靈繼命世之期運元懿清廟貞厲精粹體
仁足以長人嘉德足以合禮總六經之要括河洛之
機援天心以立均贊幽明以揆時沉靜微密淪於無
內寬裕宏博舍乎無外之纖罔不總也是以實繁於
華德盈乎譽初以父任拜郎中疾去官察孝廉是時
郡守梁氏外戚貴寵非其好也遂以病辭太守復察
孝廉乃俯而就之以明可否然猶私存衡門講誨之
樂不屑已也又委之而旋故大將軍梁冀專國作威

海內從風世之雄材優逸之徒莫不委質從命而顛覆者蓋以多矣聞君洪名前後三辟而卒不降身由是縉紳歸高辟公事德大尉司徒再辟三辟察賢良方正舉才襄賁令皆病不就擾攘之際災眚仍發聖上詢諮師錫策公車持微君仰觀天象俯效人事世路多險進非其時乃托疾杜門靜居里巷無人跡外庭生蓬蒿如此者十餘年強禦不能奪其守王爵不能滑其慮至延熹二年乃更闢門延賓享晏醇樂及秋而梁氏誅滅十二月君卒然則識機知命可觀於斯矣洋洋乎若德雖崇山千仞重淵百尺未足以喻

其高究其深也夫三精垂耀處者有表爰在上世作
者七人焉有該百行備九德齊光日月洞靈神明如
君之至者與亶所謂天民之秀也享年五十不登期
考遐邇歎悼痛心失圖乃相與建碑勒銘以徵休美
其辭曰

厥初生民天賜之性有龐有醇有否有聖伊茲周君
允丁其政誕茲明德自始哲今奧乎其文如星之布
確乎不拔如山之固追綜先緒應期作度潛心大猷
譚思德謨遁世無悶屢辭王寮洋洋必丘于以逍遙
蔑爾童蒙是訓是教瞻彼榮寵譬諸雲霄優哉游哉

侔此弘高名華夏光耀昆苗清風丕揚德音孔昭

京兆尹樊陵碑文

蔡伯喈

於顯哲尹誕德孔彰膺帝休命謂篤不忘爰納忠式
規悟聖皇欽崇園邑大孝允光九命車服昭示采章
軒輶四牲承祀蒸嘗多士時貢絲役永息進路孔夷
民清險棘同體諸舊兆萌蒙福惠垂無疆守以罔極

童子逢盛碑

童子諱盛字伯彌薄令之元孫蓮成君之曾孫安平
君之孫五官掾之長子也胎懷正氣生克自然俯育
孩嬰弱而能言至於垂髫習惠聰哲過庭受試退誦

詩禮心開意審聞一知十書畫規矩制中園梔日就
月將學有緝熙才亞后橐當爲師楷自天生授罔不
在初謂當叩遂令儀令色整齊珪角立朝進仕究竟
人爵克啓厥後以彰明德胤嗣昭達何洛季世顯天
不惠伯疆涇行降此大戾年十有二歲在協給五月
乙巳嗟噏不反爰隕精晁苗而不秀命有脩短無可
奈何慈父悼傷割哀回鯉其十二月丁酉而安措諸
永潛黃壚沒而不存於是門生東武孫理下密王升
姜感慼三成一列同義故共刊石敘述才美以銘不
朽其辭曰

嘉辭伯彌天授其姿蚩克岐嶷聰獻敏達當遂邁池
立號建基時非三代符命無恒人生在世壽無金石
身潛名彰顯於後葉

巴郡太守樊敏碑

君諱敏字升達肇祖宓戲遺苗后稷爲堯授巴郡後
漢中秋老乞身以助義都尉養疾閭里又行褒義校
尉君仕不爲人祚不爲己相桓大度體蹈其首當躬
台緄松僑協軌八十有四歲在汁洽紀驗期臻奄芻
臧形凡百咸痛士女涕冷臣子褒術刊石勒銘其辭

曰

於戲與考經德炳明勞謙損益耽古儉清立朝正色
能無撓頤威恩御下持滿億盈所歷見慕遺歌景形
書載俊艾股肱幹禎有物有則模楷後生宜叅鼎鉉
稽建皇靈王路阪險鬼方不庭恒戢節足輕寵賤榮
故關大選而損陪臣晏嬰卹殿留侯距齊非辭福也
乃辟禍兮

辭曰演元垂

關

岳瀆

關二

兮金精火佐寔生賢兮

關

欲救民德彌大兮遭遇陽九百六會兮當關遐季今
遂逝兮嗚呼哀哉覓神關兮

金鄉長侯成碑

君諱成字伯盛山陽防東人也其先出自豳岐周文
之後封于鄭鄭共仲賜氏曰侯厥胤宣多以功佐國
要盟齊魯嘉會自邠因以爲家焉漢之興也侯公納
英濟太上皇於鴻溝之險諡曰安國君曾孫黼封明
繞侯光武中興元孫霸爲臨淮太守擁兵從光武平
定天下轉拜執法右刺姦五威司命大司徒公封於
陵侯枝葉繁茂或家河洧或邑山濟君則上黨太守
之弟幼履慈孝之德長執忠審之操治春秋經博綜
書傳以典籍教授滋滋履真安貧樂道忽於時榮敬
上接下溫故知新翹節建志冠於羣倫孝友內著仁

義外宣郡請署主簿督郵五官掾功曹守金鄉長卽
家假印綬君介心如石不易其刺史嘉其高名辟部
東平泰山治中役事君獻精謙虛委蛇衡門以禮膺
桓名德可尊行顯身隱縣輿養神聖人制命曰仁常
存今胡不然喪此國偉君年八十一建寧二年歲在
己酉四月二日癸酉遭疾而卒嗚呼哀哉於足遐邇
士仁祁祁來庭集會如雲號哭發哀泣涕汎蘭將去
白日歸彼元陰同盟必至縞素填街存存顯名終有
遺勲蒐如有靈嘉斯寵榮於是儒林衆瓊惟想邢景
乃樹立銘石以揚淑美其辭曰

於穆君德姿履正平乾皇所挺應符如生耽藝樂術
怡忽世榮虛位禮請介然不傾壽非南山不俟河清
梁木圯頽鴻儀催零昆嗣切剝哀慟感情乃銘乃勒
億載永寧

金石古文卷九終

金石古文卷十

成都

楊

慎

撰

羅江

李調元

童山

校

武都太守李翁西狹頌

漢武都太守漢陽阿陽李君諱翁字伯都天姿明敏
敦詩悅禮膺祿美厚繼世郎吏幼而宿衛弱冠典城
有阿鄭之化是以三劄符守策黃龍嘉禾木連甘露
之瑞動順經古先之以博愛陳之以德義示之以好
惡不肅而成不嚴而治朝中惟靜威儀抑抑督郵部
職不出府門政約令行強不暴寡知不許愚屬縣趨
教無對會之事徼外來庭面縛二十餘人年穀屢登

倉庫惟憶百姓有蓄粟麥五錢郡西狹中道危難阻
峻綠崖俾閣兩山壁立隆崇造雲下有不測之谿隄
芒促迫財容車騎進不能濟息不得駐數有顛覆實
隊之閭過者創楚惴惴其慄君踐其險若涉淵冰嘆
曰詩所謂如集于木如臨于谷斯其殆哉困其事則
爲設備今不圖之爲患無已勅衡官有秩李瑾掾仇
審因常繇道徒鑿燒破析刻召礮嵬滅高就埤平夷
正曲柙鍤土石堅固廣大可以夜涉四方無雜行人
懽懽民歌德惠穆如清風乃刊斯石曰赫赫明后柔
嘉惟則克長君牧守三國三國清平詠歌懿德瑞降

豐稔民以慎植威恩竝隆遠人賓服鑿山浚瀆路以
安直繼禹之迹亦世賴福

成陽令唐扶頌

君諱扶字正南潁川郾人也其先出自慶都感赤龍
生堯王有天下大號爲唐洽致雍熹尊天重民禪位
虞闕光炙茅土通天三統苗胄枝分相土脉君因氏
唐焉累取舍祚受天之怙盾嗣彌光爲漢台輔君父
孝廉郎中早卒季父蜀郡蜀郡從弟會稽會稽從弟
南陽君從見東萊太守南陽弟司空公在朝透隨正
色竭忠爲國討暴六侯俱封受土襲爵金籍十三君

繼厥緒少有岐嶷耽道好古孰書咏詩綜緯河雒底
究羣典彜紐上進守舞陽丞弱冠守昆陽尉潁陽令
隱練州郡所臨有迹帝嘉其德特拜郎中察能洽處
除豫章鄔陽長夷粵拊摠懷強難化君奮威颺武視
以好惡蠻貉振壘稽顙飾服闕上前逋千有餘萬盜
賊裴息境界晏然三載有成州郡詳表遷成陽令承
先聖之弘軌見讚像之高蹤遂興無爲之治優賢賜
歷表善紕惡遵九德以綏民崇晏晏之惠康風移俗
易莫不革心朝有公卓家有叅騫分剌之治復隆生
於君追惟堯德廣被之恩依陵毫廟造立授堂四遠

童冠摠衣受業著錄于人朝益莫習衍衍閭閻尼父
授魯曷以復加靈祇瑞應木連理生白菟紫鳩遊君
園庭蕩蕩之治莫能名焉三司察功朝廷審真以君
威恩竝流文武兼興東萊海濱須君以寧詔書換君
昌陽令吏民慕戀士女惟艱捺宰君車輪不得行君
臣流涕道路琅玕迫有詔命靡由復還於是故從事
仲宇仲授張躬萬龍督郵仲規郡掾閻葵闕仲瑄處
士王闕董頴閻葵斑等乃共刊石樹頌歌君之美其
辭曰

赫赫唐君帝堯之苗氏族不一各任所安本莫末異

蓋謂斯焉君體煥炳有芬有馨如山如砥嵩如不傾
如闕如海澹如不盈帷直如矢秉銓據衡在朝肅肅
閨門雍雍廉踰伯叔絜如珪璋賦政于外爰及鬼方
淮夷來降寇賊遂亡黎庶攸寧黔首歡康以德綏撫
宣恩六陽以仁恤弱以義抑強恩由春夏威如秋霜
賞罰分守審白黑著明憂者閔稚不悔寡矜耽樂道
迹阻嚼七經五六六七訓導若神接下施與投財如
損吏服其德民歸其恩父父子子君君臣臣不師白
舉不拘不煩囿圉空虛國無民德及草虫滓流無根
娟飛蠕動咸賴我君顯顯令稱德音常存

魏大饗碑

惟延康元年八月旬有八日辛未魏王龍興踐祚規
恢鴻業構亮皇基萬邦統世忿吳夷之凶暴滅蜀虜
之僭逆于赫斯怒順天致罰舊虓虎之校簡猛銳之
卒爰整六軍率匈奴暨單于烏桓鮮卑引弓之類持
戰百萬控弦千隊玄甲耀野華旗蔽日天動雷震星
流電發戎備素辨役不更籍農夫安疇商不變肆是
以士有拊譟之驩民懷惠康之德皇恩所漸無遠不
至武師所加無強不服故寬令西飛則蜀將東馳六
旆南徂則吳黨委質二虜震驚魚爛階潰將汜自三

江之流方軌邛來之阪斬吳夷以染鉞血蜀虜以豐
鼓曜天威於遐裔復九圻之疆寓除生民之尖孽去
聖皇之宿憤次于舊邑觀釁而動築壇壝之官置表
著之位大饗六軍爰及譙縣父老男女臨饗之日陳
兵清涂慶雲垂覆乃備俾禦整法駕設天官之列衛
乘金華之鸞路建升龍於大常張天狼之威弧干葉
風舉萬騎龍驤威靈之飭震曜康衢旣登高壇蔭九
增之華蓋處流蘇之幄坐陳旅酬之高會行無筭之
酣飲于酒波流沓烝陵積瞽師設縣金奏讚樂六變
旣畢乃陳祕戲巴俞九劍奇舞麗倒衝夾踰鋒上廟

踰高船鼎緣橦舞輪擲鏡騁狗逐兔戲馬立騎之妙
拔白虎青鹿辟非辟耶魚龍靈龜國鎮之怪獸環變
屈出異巧神化自卿校將守以下下及陪臺綵園莫
不歆淫宴喜咸懷醉飽雖夏啓均臺之享周成岐陽
之饗高祖邑中之會光武舊里之宴何以尙茲是以
刊石立銘光示來葉其辭曰

赫王師征南裔舊靈威震天外吳夷讐蜀虜竄區夏
清八荒艾幸舊邦設高會皇德洽洪恩邁刊金石光
萬世

魏散騎常侍步兵校尉東平太守碑

稽叔夜

先生諱籍字嗣宗陳留尉氏人也厥遠祖陶化於上世而先生弘謨於後代詩所載阮國則是族之本也先生承命世之美希達節之度得意忘言尋妙於萬物之始窮理盡性研幾於幽明之極和光同略羣生莫能屬也確不可拔當塗莫能貴也或出或處與時升降或默或語與世推移望其形者猶登嶽涉海蕩然無以究其高測其深覽其神者猶旁璞親珪肅然無不欽其寶而偉其奇也不屑夷齊之潔故其情不可尚也不履思連之汙故其道不可屈也蘧瑗升降

於卷舒甯武去就於 盼一子不亦泰如危宗廟之
犧安不 孤犢之逼而有塗中之廣觀屈穀鳴鴈是

以處下

之間察巨瓠緯帶是以遊有用之際夸大

辨而御之以訥資大白而滂之以厚辱

一作辱

爲無爲而

名不能累也事無事而世不能役也訪垂天之翼於
寂寞之域投芒刀之穎於有解之會固恢恢必餘地

豈若接輿被張以養生於陵觀園以求實齷齪近步

脩

一作循

軌轍而已哉尼父議老成於遊龍衛賜譬重

仞於日月揆之先生其殆庶幾乎方將攀逸駕於洪
涯懇遐軌於巢州跨宇宙以高挹陵雲霄以優游享

年如干邁病而卒於是遠鑒之士有識之徒先生之
沒夫豈不慨然臨豪桀而存惠之問運斧斲而思郢
人之力乃探頤索隱以敘雅操使將來君子知壯生
之跡略舉其志埋之曰峩峩先生天挺無欲元虛恬
淡混蘊榮辱盪滌穢累婆娑山足胎胞造化韜蘊光
燭鼓棹滄浪彈冠嶠岳頤神太素簡邁世局澄之不
清濶之不濁翺翔區外遺物庶俗隱處巨室反真歸
漠汪汪淵源邁跡圖錄

金石古文卷十終

金石古文卷十一

成都 楊慎

撰

羅江

李調元

山童

校

漢榮瀆石門碑

惟陽嘉三年二月丁丑使河堤謁者王誨疏達河川
述荒庶土云大河衝塞侵齧金堤以竹籠石葺葦土
而爲邊壤墮無已功消億萬請以濱河郡徒䟽山采
石壘以爲鄣功業旣就徭役用息未詳詔書許誨立
功府卿規基經始詔策加命遷在沅州乃簡朱軒授
使司馬登令纘茂前緒稱遂休功登以伊洛合注大
河南則緣山東過大伾回流北岸其勢鬱濛濤怒湍

急激疾一有決溢彌原淹野蟻孔之變害起不測蓋
自姬氏之所常蹙昔崇鮪所不能治我二宗之所劬
勞於是乃跋涉躬親經之營之率百姓議之于臣伐
石三谷水匠致治立激岸側以捍鴻波隨時慶賜說
以勸之川無滯越水土通演役未踰年而功程有畢
斯乃元勲之嘉課上德之弧表也昔禹脩九道書錄
其功后稷躬稼詩列于雅夫不憚勞之勤夙興厥
職充國惠民亦得湮沒而不章焉故遂刊石記功垂
示于後其辭云云使河堤謁者山陽東昏司馬登字
伯志伐東萊典城王誨字孟堅河內太守守城向豹

字伯尹丞汝南鄧方字德山懷令劉丞字季意河堤
掾匠等造陳留浚儀邊韶字孝先頌

魏野王令司馬字脩沁口碑

臣孚言臣彼明詔興河內水利臣旣到檢行沁水源
出銅堤山屈曲周廻水道九百自大行以西王屋以
東層巖峻天時霖雨衆谷走水小石漂送木門朽敗
稻田汎灑歲功不成臣輒按行去堰五里以外方石
可得數萬餘枚臣以爲方石爲門若天敖旱增堰進
水若天霖雨陂澤充溢則閉方斷水空渠衍澇足以
成河雲雨由人經國之謀暫勞永逸聖王所許願陛

下特出臣表勅大司農府給人工勿使稽延以贊時
要臣孚言詔書聽許

魏建城鄉侯劉靖碑

魏使持節都督河北道諸軍事征北將軍建城鄉侯
沛國劉靖宇文恭登梁山以觀源流相隙以度形勢
嘉武安之通渠羨秦民之殷富乃使帳下督丁鴻軍
士千人以嘉平二年立遏於水道高粱河造戾陵遏
開車箱渠其遏表云高粱河水者出自井州黃河之
別源時長岸峻固直截中流積石籠以爲主遏高一
丈東西長三十丈南北廣七十餘步依北岸立水門

門廣四丈立水十丈山川暴戾則乘遏東下平流守
常則自門北入灌田歲二千頃凡所封地百餘萬畝
至景元三年辛酉詔書以民食轉廣陸發不贍遣謁
者樊晨更制水門限田千頃刻地四千三百一十六
頃出給郡縣改定田五千九百三十頃水流乘車箱
渠自薊西北逕昌平東盡漁陽潞縣凡所潤舍四五
百里所灌田萬有餘頃高下孔濟原隰底平疏之斯
漑決之斯散導渠口以爲濤門灑漉池以爲甘澤施
加於當時敷被于後世晉元康四年君少子驍騎將
軍平鄉侯引受命使持節監幽州諸軍事領護烏丸

校尉寧朔將軍過立積三十六載至五年夏六月洪水暴出毀損四分之三乘北岸七十餘丈上渠車箱所在漫溢追惟前立過之勲親臨山川指授規略命司馬關內侯逢惲內外將士二千人起長岸立石渠脩立過治水門門廣四丈立水五丈興復載利通塞之宜准遵舊制凡用功四萬有餘焉諸部王侯不召而自至纒負而事者蓋數千人詩載經始勿亟易稱民忘其勞斯之謂乎於是二府文武之士感秦國思鄭業之績魏人置豹祀之義乃遐慕仁政追述成功元康五年十月十一日刊石立表以紀勲烈并記過

制度永爲後式焉

晉千金渠石人東脇下文

太始七年六月二十三日大水并瀑出常流上三丈
蕩壞二塌五龍泄水南注瀉下加歲久漱齧每勞卽
壞歷載消弃大功今故爲令遏更於西開泄名曰伐
龍渠地形正平誠得爲泄至理千金不與水勢激爭
無緣當壞由其卑下水得輸上漱齧故也今曾高千
金於舊一丈四尺五龍自然必歷世無患若五龍歲
久復壞可轉於西更開二塌二渠合用二十三萬五
千六百九十八功以其年十月二十三日起作功重

小人到八年四月二十日畢

西脇下亦有刻文不錄

後漢鴻臚陳君碑文

邯鄲子禮

君諱紀字元方太丘君之元子也始祖有虞受禪陶亦以命禹其後媯滿當周武王時祚土于陳君其世也君生應乾坤之純質受嵩岳之粹精內包九德外兼百行淵深淪於不測膽智應於無方弘裕足以容衆矜嚴足以正世然後研幾道奧涉覽文學凡前言往行竹帛所載靡不坐該其善也疊疊焉其誘人也是以令聞廣譽塞于天淵儀形嘉誨範乎人倫存

乎本傳故略舉其著於人事者焉顯考以茂行崇冠
先儔季弟亦以英才知名當世孝靈之初竝遭黨錮
俱處于家號曰三君故得奉常供養以循子道親執
饋食朝夕竭歡及太丘君疾病終亡喪過乎哀崩傷
嘔血如此者數焉服禮旣除戚容彌甚聞名心矍言
及隕涕雖大舜之終慕曾參之自盡無以踰也豫州
刺史嘉懿至德命勅百城圖畫形像于今遺稱越在
民口旣處隱約潛躬味道足不踰闕乃覃思著書三
十餘萬言言不務華事不虛設其所交釋合贊規聖
哲而後建旨明歸焉今所謂陳子者也初平之元禁

罔蠲除四府竝辭弓旌交至雖崇其禮命莫敢屈用
大將軍何進表選明儒君爲舉首公車特徵起家拜
五官中郎將到遷侍中旬有八日出相平原會孝靈
晏駕賊臣秉政肆其兇雷剝亂宇內州郡幅裂戎輿
竝戎君冒犯鋒矢勤恤民隱馴之以禮教示之以知
耻視事未朞士女向方會刺史敗於黃巾幽冀二州
爭利其工君料敵知難不忍其民爲已致死乃辭而
去之於郟之野袁術恣睢僭號江淮圖覆社稷結婚
呂布斯事成重必不測救君諗布不從遂與成婚送
女在塗君爲國深憂乃奮策出奇以奪其心卒絕好

追女而還離逃姦謀使不得成國用又安君之力也
唯帝念功命作尙書令會車駕幸許拜大鴻臚實掌
九儀四門穆穆遂登補袞闕以熙帝載不幸寢疾年
七十有一建安四年六月卒惜乎懷道處否登庸日
寡實使大業不究元勳靡建茲海內所爲嗟悼凡百
所以失望也天子愍焉使者弔祭郡卿以下臨喪會
有子曰郡追惟蓼莪罔極之恩乃與邦彥碩老咨所
以計功稱伐銘贊之義遂樹斯石用監于後其辭曰
於穆上德時惟我君固天縱之天鍾厥純命世作則
實紹斯文遭險龍潛抗志浮雲所貴在己樂存事親

雖處畎畝天子屢聞乃階郎將陪帝作鄰平原寇深
遂辭其民思齊古公邠土是因不忘諗國惠我無垠
復命喉舌秉國之均爰登卿士媚茲一人如何穹蒼
不授遐年尠厥在位每懷不申股肱或虧朝誰與詢
煢煢小子號泣于旻勒銘表德久而彌新

金石古文卷十二

成都 楊慎 撰 羅江 李調元 童山 校

漢樊毅脩西嶽廟記

山經曰泰華之山削成四方其高五千仞廣里周禮
職方氏華謂之西嶽祭視三公者以其能興雲雨產
萬物通精氣有益於人則祀之故帝舜受堯歷數親
自巡省設五鼎之奠柴燎煙致敬神祇又用昭明百
穀繁殖黎民時雍鳥獸率舞鳳凰來儀暨夏殷周未
之有改也其德休明則有禎祥荒淫臊穢篤災必降
秦違其典壁遺鄗池二世以亡高祖應運禮遵陶唐

祭則獲福奕世克昌忘新滔逆鬼神不享建武之初
彗掃頑凶更率舊章敢用元牡牲牲必充天惟醇祐
萬國以康光和二年有漢元舅五侯之胄謝陽之孫
曰樊府君諱毅字仲德承考讓國家于河南究職州
郡辟公府除防東長中都令誅強虺撫瘠民二鄙以
清命守斯邦威隆秋霜恩踰冬日景化旣宣由復夕
惕惟窺祿之報順民之則孟冬十月齊祀西嶽以傳
窄狹不足處尊碑廟舍舊久墻屋傾亞世室不脩春
秋作譏特部行事荀班與縣令先黨以漸補治設中
外饋圖珍奇畫怪獸嶽瀆之精所出禎秀 于時

而功已著，斲勞久逸，神永有憑。自古大山邱邑，猶存五嶽尊同，哀此勤民，獨不賴福。乃上復十里內工商農賦，克厭帝心，嘉瑞仍合，風雨應起，澱潤品物。君舉必書，况乃盛德，惠及神人，可無述焉。於是功曹郭敏主簿魏龔、戶曹史許禮等，遂刊元石，銘勒鴻勛，垂耀靈軫，存有昭識。其辭曰：二儀剖判，清濁始分，陽凝成山，陰積爲川，泰氣推否，洪波况臻。堯命伯禹，決江開汶，川靈既定，恩覆兆民。乃刊祀典，辨于羣神，因瀆祭地，嶽以配天。世主遵循，永享歷年，赤銳煌煌，受茲介福。京夏密清，殊俗賓服，令問不違，可謂至德德音。孔

昭實惟我后出自中興大漢之舅本枝惟百延慶長
久俾守西嶽達奉神祀改傳飾廟靈則有攸齊降瑞
畲祚景風凱涕惟風及雨成我稷黍稽民用章建乂
空宇刊銘記誦 配梁甫

西嶽華山亭碑

衛 凱

惟光和元年歲在戊子名曰咸池季冬己巳弘農太
守河南樊府君諱毅字仲德下車之初恭肅神祀西
嶽至尊詔書奉詞躬親自往省從勞謙卽事有漸散
齊華亭齊堂逼窄郡縣官屬清齊無處尊卑錯綜精
誠不固畏天之威逢斯瘴怒時雨不興甘澍不布念

存黔首懼闢曠素於是與令巴郡胸忍先讜公謀圖
議繕故斷度榑廊立室異處左右趣之莫不競慕二
年正月己卯興就旣成有元休嘉啓寤各得竭情福
祿是顧刻茲碑號吏卒俠路其辭曰

巖巖西嶽五鎮次宗緒德之尊太華優隆皇帝永思
祀典孔明高神肯宴圭璧贄通赫赫在上以畜萬邦
惟嶽降神寔生羣公卿士百辟績業攸蒙帝命不違
歲事報功羣后命卿散齋外亭敬恭明祀以奉 靈
處所逼窄屑宰有聲神樂其靜脩翬無形尊碑有序
潔心致誠因繕舊室整頓端平在其板屋孰不嘉精

天人同道萬祚來迎既受帝祉延子後生爲龍爲光
顯人王庭爲公爲侯福祿來成刻石記號永享利貞

西嶽華山堂闕碑銘

易曰天地定位山澤通氣然山莫尊於嶽澤莫盛於
瀆山嶽有五而華處其一瀆有四而河在其數其靈
也至矣聖人廢興必有其應故岱山石立中宗繼統
太華授壁秦胡絕緒白魚入舟姬武建業寶珪出水
子朝喪位布五方則處其西列三條則居其中若廣
袤奇蟲山經有紀矣是以帝王巡狩親五嶽而告至
覲方后而考禮故經有望秩之禮典有生殖之祀蓋

所以崇山川而報功也四海一統天子秉其禮諸侯力政疆國攝其祭奉其邑曰華陰也久矣乃紀於禹貢而分秦晉之境奉鄙晉之西則曰陰晉邊秦之東則曰寧秦邑旣遷徙禮亦如之二國力爭以奉以祭其城險固基趾猶存故老之言未殞於民也逮至大命克亂不愆不忘舊名是復率禮不越故祀是尊歷葉增脩虔恭又備一禱三祀終歲而四以迄于今而世宗又經集靈之宮於其下想喬松之壽是遊是憇郡國方士自遠而至者充巖塞崖卿邑巫覡宗祀乎其中者盈谷溢谿咸有浮飄之志愉悅之色必

雲霄之路可升而越果繁昌之福可降而致也故殖財之寶黃玉自出令德之珍卿相是毓匪惟嵩高降申甫此亦有焉天有所興必先廢之故殷宗周宣以衰致盛是時也王業中缺大化陵遲郡縣旣毀財匱禮乏庭廟傾壞壇塲蕪穢祭祀之禮有缺焉於是鎮遠將軍領北地太守闔鄉亭侯段君諱煨字忠明自武威占此士憑託河華二靈是與故能以昭烈之德享上將之尊御命持重屯斯寄國討叛柔服威懷是示羣兇旣除郡縣集寧家給人足戶有樂生之歡朝釋西顧之慮而懷關中之恃雖昔蕭相輔佐之功效

冠羣后弗以加也遂解甲休士陣而不戰以逸其力
脩飾享廟壇塲之位荒而復辟禮廢而復興又造祠
堂表以參闕建神路之端首觀壯麗乎孔徹然后箴
祀祈請既有常處雖雨露衣而禮不廢於是邑之士
女咸曰宜之乃建碑刻石垂示後裔其辭曰於穆堂
闕堂闕昭明經之營之不日而成匪奢匪儉惟德是
程匪豐匪約惟禮是榮虔恭禋祀黍稷芬馨神具醉
止降福穰穰

桐柏廟碑

王延壽

延熹六年正月八日乙西南陽太守中山盧奴張君

處正好禮尊神敬祀以淮出平氏始於大復潛行地
中見於陽口立廟桐柏春秋宗奉災異告譴水旱請
求位比諸侯聖漢所尊受珪上帝太常定甲郡守奉
祀務潔沈祭從郭君以來二十餘年不復身到遣行
承事簡略不敬明神弗歆災害以生五嶽四瀆與天
合德仲尼慎祭常若神在君準則大聖親之桐柏奉
見廟祠崎嶇逼狹開拓神門立闕四達增廣疆場飾
治華蓋高大殿宇穹齊傳館石獸表道靈龜十四衢
廷弘敞宮廟嵩峻祇慎慶祀一年再至躬進牲牲執
王以沈爲民祈福靈祇報祐天地清和異祥昭格禽

獸碩茂草木芬芳黎庶預祉民用作頌其辭曰
泝泝淮源聖禹所導湯湯其逝惟海是造疏穢濟遠柔順
其道弱而能強仁而能武聖賢立式明哲所取定爲
四瀆與河今烈烈明府好古之則虔恭禮祀不愆
其德惟前廢弛匪恭匪力灾眚以興陰陽以忒陟彼
高岡臻茲廟側肅肅其敬靈祇降福雍雍其和民用
悅服穰穰其慶年穀豐植望君輿駕扶老携集暴君
塵軌奔走忘食懷君惠况思君罔極于胥樂兮傳於
萬億

九疑山碑

蔡邕

巖巖九疑峻極于天觸石膚合興播建雲時風嘉雨
浸潤下民芒芒南土實賴厥勛逮于虞舜聖德光明
克諧頑傲以孝蒸蒸師錫帝世堯而授徵受終文祖
璇璣是承太階以平人以有終遂葬九疑解體而升
登此崔嵬託靈神仙

金石古文卷十二終

金石古文卷十三

成都 楊慎 撰 羅江 李調元 童山 校

楚相孫叔敖碑

楚相孫君諱饒字叔敖本是縣人也六國時期思屬
楚楚都南郢南郢卽南郡江陵縣也君受純靈之精
懷絕世之才有大賢次聖之質少見枝首虵對其母
泣吾將死母問其故曰吾聞見枝首虵者死今日見
之母曰若奈之何吾旡行數十步念獨吾死可空復
令他人見之死爲因埋掩其荆母曰若無憂焉其陰
德元善遂爲父母九族所異及其爲相布政以道考

天象之度敬授民時聚藏於山殖於藪宣導川谷
波障源淥旣灌沃澤堤防湖浦以爲池沼鍾天地之
美收九罭之利以愍濶國家富人喜優瞻樂業拭
序在朝野無螟滅豐年蕃庶人有曾閔貞孝之行四
民美好從容中節高相改幣一朝而化其憂國忘私
乘馬三年不別牝牡繼高陽重黎五舉子文之統其
忠信廉勇禮樂文章軌儀同制其富國充民明天時
盡地力寔堅禹稷不能踰也專國權寵而不榮華一
旦可得百金至至於歿齒而無分銖之蓄破玉玦不
以寶財遺子孫終始若矢不去善如絕絃辟患害於

無刑徹節高義敦良奇介自曹臧孤竹吳札子罕之
倫不能驟也生於季末仕於靈王立溷濁而澄清處
幽暗而照明其遺武餘典恨不與戲皇帝代同世世
爲列姬國在朝廷其意常墨墨若冠章甫而坐塗炭
也病甚臨卒將無棺槨令其子曰優孟曾許千金貸
吾孟故楚之樂長與相君相善雖言千金實不貸也
卒後數幸莊王置酒以爲樂優孟乃言孫君相楚之
功卽忼慨高歌曲曰貪吏而可爲而不可爲廉吏而
可爲而不可爲貪吏而不可爲者當時有污名而可
爲者子孫以家成廉吏而可爲者當時有清名而不

可爲者子孫困窮被褐而賣薪貧吏常苦富廉吏常
苦貧獨不見楚相孫叔敖廉潔不受錢涕泣數行若
投首王王心感動覺悟問孟孟具列卽來其子而加
封焉子辭父有命如楚不忘亡臣社稷圖而欲有賞
必於潘國下濕堯堯人所不貪遂封潘卿卽固始也
三九無嗣國國絕祀廢固始令段君夢見孫君則存
其後就其故祠爲架廟屋立石銘碑春秋丞嘗神明
報祚卽歲還長發太守及期思縣宰段君諱光字世
賢魏郡鄴人庶 光賢體德允恭篤古遵舊奉履憲
章欽翼天道五典興通攷籍祭祀祇肅神明臨縣一

載志在惠康葬枯粟乏愛育藜蒸討掃醜類鰥寡是
矜社僞養善是忠表仁感想孫君迺發嘉訓興祀立
壇勤勤愛敬念意自然刻石銘碑千載表績萬古標
記福祐期思縣興士熾孫氏蒙恩漢延熹三年五月
二十八日立

漢故中常侍騎都尉樊君之碑 子 遷

君諱安字子祐南陽湖陽人也厥祖曰仲山父翼佐
周宣出納王命爲之喉舌以致中興食菜于樊子孫
氏焉奕世載德守業不愆在漢中葉篤生哲媛合南
頓寶產世祖征討逆畔復漢郊廟而樊氏以帝元舅

顯受茅一封寵五國壽張侯以功德加位特進其次
竝已高聲處鄉校侍中尙書據州典郡不可勝載爲
天下學治韓詩論語孝經兼典記傳古今異義甘貧
樂約意不回貳天資淑慎稟性有直秉操不移不以
凱貴世政促峻邑宰寡識慢賢役德被以勞事然後
慷慨官于王室歷中黃門沉從儀史拜小黃門小黃
門右史遷藏府令中常侍其事上也貞固密慎矜矜
戰戰作主股肱助國視聽外職不誣內言不泄爲近
臣楷模以兄弟竝盛雙據二郡宗親奈賴榮年五十
有六以永壽四年二月甲辰卒朝思其忠追拜都尉

寵以應綬策書褒歎賻贈有加嗣子遷寔以幼弱夙
敏王爵而喪其所天禮備復位以延熹三年冬十有
一月自上蒸祭乃尋惟烈考恭脩之懿勒之碑石俾
不失墜其辭曰

肅肅我君帝躬是翼王事多難我是力秉此小心以
亮皇職惟帝念功庸以輿服大命傾實覓神遷佚龜
艾追贈用光其德藹藹遺稱作呈作式勒銘茲石垂
示罔極勳名不剝永昭千億

漢金城太守殷君碑

衛 覲

君諱華字叔時上郡乏陽人大匠君之子也其先出

自有殷因國定氏不改其號聖哲元流至君而懿幼
應瓊蘭之美長有冲逸之志敦詩閱禮韜韜竹貫誕
循前業守以恪恭仕歷州郡忠愕有分其大操也耽
耽虎視龍變不羈故能雄傑於并域聲班於上京察
何孝廉貢除郎中左馮翊丞協宣文物公事知州譽
茂才宛丘令崇行寬猛示之禮禁褒延庠校政以惠
和三載陟隕邪臨金城郡鄣羌虜避難遷移役兼民
匱室如懸磬乃敷權略獎厲信獫狁率服不敢窺踰
兵戢而時動因省獵以習義興利弭患順其所樂開
通狹道造作傳館吏事咸悅不勞而勸是以搢紳之

徒譚講雅誦釋軍旅之犀革陳俎豆於泮宮其艾檐
幹旌顯才良咨量三壽賞刑不僭邦場寧靜歲時豐
登耆叟擊壤童胤謳譟功碁垣列當升寵祚旻不耆
德景命失靈以光和元年九月乙酉卒官生有嘉休
終則鼎銘於是故吏邊竺江英韓遂等追送遐丘刊
石勒勛其辭曰

於惟明后懷德握醇昆台之耀秀出不羣文昭有毅
武列能仁含舒憲墨以育生民乘紀東壤西國著勛
身沒名流載世常存古之遺老非此孰云子爾臣恩
續其旻芬

河間相張平子碑

崔瑗

河南相張君南陽西鄂人諱衡字平子其先出自張
老爲晉大夫納規趙武而反其侈傳美之君天姿獻
哲敏而好學如川之逝不舍晝夜是以道德漫流文
章雲浮數術窮天地制作侔造化壤辭麗說奇技偉
藝磊落煥炳與神合契然而體性溫良聲芬芳仁愛
篤密與世無傷可謂淑人君子者矣初舉孝廉爲尚
書侍郎遷太史令實掌重黎歷紀之度亦能焯燿敦
大天明也德光照有漢遷公車司馬令侍中遂相河
間政以禮成民是用息遭命不永閤忽畧祖朝失良

臣民隕令君大泯斯道世喪斯文凡百君子靡不傷
焉乃銘斯表以旌厥問其辭曰

於維張君資質懿豐德茂林羨高明顯融焉所不學
亦何不師盈科而逝成章乃達一物不知實以爲耻
聞一善言不勝其喜包羅品類稟授無形酌焉不竭
冲而復盈廩廩其庶豐豐其幾膺數命世紹聖作師
荀華必實令德惟恭柔嘉伊則孝友祇容允出在茲
維帝念功往才女諧化洽民雖愍而不弔降此咎哲
人其萎罔不時恫紀于銘勒永終譽兮死而不朽芳
烈著兮

曹娥碑

邯鄲淳

孝女曹娥者上虞曹盱之女也其先與周同祖未胄
荒流爰茲適居盱能撫節按歌婆娑樂神以漢安二
年五月時迎五君逆濤而上爲水所淹不得其尸時
娥年十四號慕思盱哀吟澤畔旬有七日遂投江死
經五日抱父屍出以漢安迄于元嘉元年青龍在辛
卯莫之有表度尙設祭誅之辭口鬱伊孝女擘擘之
姿偏其反而令色孔儀窈窕淑女巧笑倩兮宜其家
室在洽之陽大禮未施嗟喪慈父彼蒼伊何無父孰
怙訢伸告哀赴江永號視死如歸是以眇然輕絕投

入沙泥翩翩孝女載沉載浮或泊洲渚或在中流或
趨湍瀨或逐波濤千夫失聲悼痛萬餘觀填道雲集
路衢泣淚掩涕驚慟國都是以哀姜哭市杞崩城隅
或有剋面引鏡斨耳用刀抱樹而燒於戲孝女德茂
此儔何者大國防禮自脩豈况庶賤露屋草茅不扶
自直不鏤自彫越梁過宋比之有殊哀此貞厲千載
不渝嗚呼哀哉辭曰

名勒金石質之乾坤歲數歷祀立廟起坊光于后土
顯昭天人生賤死貴利之義門何悵華落飄零早分
葩艷窈窕永世配神若堯二女爲湘夫人時効髣髴

以昭後昆

金石古文卷十三終

金石古文卷十四

成都 楊慎 撰 羅江 李調元 校

魏敬侯衛覬碑陰文 聞人牟準

敬侯所葬之先域城惟解梁地卽鄆首山對靈足谷
當猗口勢高而趣幽形垣而背阜鑿室而可以蔽藏
不墳而所冀速朽珍琦素白而靡尙衣服隨時而則
有故吏述德於隧前門生紀言於碑後曰季居亭而
已治簷嘉在主而可友處高攄之厚地將秭億而永
久所著述注解故訓及文筆等甚多皆已失墜所注
孝經固而倉頡冢碑大篆書在左馮翊利陽亭南道

旁及華山下亭碑增筭狀殷叔時碑魏大饗碑羣臣
上尊號奏及受禪石表文竝在許繁昌尊號奏鍾常
書受禪表顛竝全針八分書也太祖帝等臨詔令
雜駁議上封事一百餘條誠子等散在人間及碑石
可見樹碑人郡國縣道姓名其如于後

黃陵廟記 節文

諸葛孔明

僕躬耕南陽之畝遂蒙劉氏顧草廬勢不可卻計事
善之於是情好日密相拉總師趨蜀道履黃牛因覩
江山之勝亂石排空驚濤拍岸斂巨石於江中崔嵬
噴峴列作三峯平治泝水順遵其道非神扶助於禹

人力奚能致此耶僕縱步環覽乃見江左大山壁立
林麓峯巒如畫熟視於大江重復石壁間有神像影
現焉鬢髮鬚眉冠裳宛然如彩畫者前豎一旌旗右
駐一黃犢猶有董工開導之勢古傳所載黃龍助禹
開江治水九載而功成信不誣也惜乎廟貌廢去使
人太息神有功助禹開江不事鑿斧順濟舟航當廟
食茲土僕復而興之再建其廟貌目之曰黃牛廟以
顯神功

漢武帝鼎銘

登于秦山萬壽無疆四海寧謐神鼎傳芳

漢武帝封禪刻石辭

四守之內莫不爲郡邑四夷八蠻咸來貢職與天無
極又民蕃息天祿永得

漢祭金馬碧鷄文

持節使者王褒敬移南崖金精神馬綜綜碧鷄處南
之荒深溪回谷非上之鄉歸來歸來漢德無疆廣于
唐虞澤配三皇黃龍見兮白虎仁歸來歸來可以爲
倫歸兮翔兮何事南荒也

漢祝長嚴訴碑銘

惟漢中興卯金休烈和平元年歲治東宮屯民寧厥

居

漢圉令趙君碑銘

天實高唯聖同戲我君羨其踪體弘仁蹈中庸所臨
歷有豐功追景行亦難雙刻金石示萬邦

漢王史威長銘

明明哲士知存知亡崇隴原野非寧非康不封不樹
作靈垂光厥銘何依王史威長

漢資中古碑伏羲贊

見史子

堅隸格

伏戲倉精初造工業畫卦結繩以理海內

內晉越

後漢祝睦碑銘

穆我君邦之陽資五就闡道綱立表微準樞衡稽列
宿覽四方德合乾道應皇領一郡曜重光化流洽緄
幽昌性天約元用長頌聲作謠令香功烈著遺椒芳
存覲榮淪弗忘

後漢愼令劉伯麟碑銘

於惟君德忠孝正直至行通洞高明柔克知命不延
引輿旋歸忽然輕舉志激拔葵人皆有亡貴終譽兮
沒而不朽垂名著兮

漢司隸校尉楊厥碑

惟從靈定位川澤攸同澤有所注川有所通斜谷之

水其澤南隆八方所達益城爲充高祖受命興于漢
中道由子午出散入秦建定帝位以漢詆焉後以子
午塗路澁難更隨同谷復通堂光凡此四道垓鬲尤
艱至于永平其有四年詔書開斜邁通石門中遭元
二西夷霍殘橋梁斷絕于谷復循于是故司隸校尉
犍爲武陽楊厥字孟文深執忠伉數王奏請廢于由
斯得其度經至建和二年漢中太守王升字稚紀嘉
君明知美其仁賢勒石頌德以明厥勛

漢折里邨閣頌

惟斯折里處漢之右溪源漂疾橫注于道涉秋霖澁

稽滯商旅休謁往還常失日晷行理咨嗟郡縣所苦
斯溪旣然鄙閣尤甚臨深長淵三百餘丈接水相連
號爲萬柱遭遇墮納人物俱隋沈沒洪淵酷烈爲禍
於是太中阿陽李君諱會字伯都以建寧三年二月
辛巳到官思惟惠利有以綏濟聞此爲難其日久矣
乃俾府掾仇審改解危殆卽便求隱折里大橋於爾
乃造又醜散關之巉潔徙朝陽之平燠滅西高閣乾
安寧之石道禹導江河以靖四海經紀厥績艾康萬
里

歐公跋云醜散關之巉潔徙朝陽之平燠刻畫

適完非其訛謬而莫詳其義故錄之以俟博識君子

今按醪古與釋通史記張儀傳杖而醪之韓信傳醪兵北首燕路趙明誠金石錄載漢碑文有云農夫醪來又云辭榮醪黻潔本濟潔之潔漢人或寫作潔借作濕字用潮潔謂潮濕也爇與燥同分隸小異如摻亦作操之例平爇謂乾燥也言去濕而就燥也以假借之義訓之亦通升菴楊慎重跋

漢無終山陽雍伯天祚玉田之碑

玉田縣西北有陽公壇社卽陽公之故居也陽公名
雍伯雒陽人是周景王之孫食采陽樊春秋之末爰
宅無終至性竺孝父母終沒葬之於無終山山高八
十里而上無水雍伯置飲焉有人就飲與石一斗令
種之玉生其田北平徐氏有女雍伯求之要以白璧
一雙媒氏致命雍伯至玉田求五雙徐氏妻之遂嫁
焉性不好寶玉田自去今猶謂之爲玉田

金石古文卷十四終